

# Rom

## adi letama

---

### Pol na waikaiwama

**1** Kapore yau banagama Rom nopone miemienimima,

<sup>1</sup>Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol Mamaitua varinama verenama yà rauguguyena. <sup>2</sup>Uma varinama verenama inam boni Mamaitua na perovetama ġarodie ya sauga be na bukama babaunama poranama nopone a girumi be e kenakenana. <sup>3</sup>Uma varinama verenama inam natunama dà Badama Yesu Keriso ya giuena. Tauna tubuġa ġoma yauwane, tauna Deivid natunama,<sup>a</sup> be <sup>4</sup>Arua Babau yauwane, tauna Mamaitua Natunama wairewapaninama. Nama Mamaitua yai maġataridana, baninama tauna natunama Arua na rewapanae, gurie ya midisuġu munaġana. Tauna vutuna Yesu Keriso, dà Badama. <sup>5</sup>Tauna na raukivivere tauma apasol noyanama kè paġona, da eteni banegidima matabudi ka riuedi da taudi sibo Bada ai sumāġe be a voteyeteyena.

<sup>6</sup>Be taumi mate uma damnama nopodie, baninama Mamaitua taumi ya vinemi da taumi Yesu Keriso ġaroġaronama. <sup>7</sup>Uma letanama yà girugirumina, taumi aitauġa Rom nopone ġaromie. Mamaitua taumi yai nuapaġoemi be ya vinemi da banaga babaumima. Tamadama Mamaitua be Bada Yesu Keriso adi raukivivere be adi subama ġaromie e kenana.

**Pol ya ġoena da sibo Mamaitua na damma Rom nopone ya vakitedina.**

<sup>8</sup>Noġone taugu yau Mamaituama yà kaiwena Yesu Kerisoe taumi matabumi aubaimima, baninama taumi ami waisumaġama dobu matabuna banaga ta giugiuena. <sup>9-10</sup>Mamaitua tauna vutuna yau matamatama, da raġan matabuna taumi yau moiragie yà noġonoġotimina. Uma Mamaituanama taugu yà noyenoyena

---

<sup>a</sup> **1.3** Uma baninama tauna Deivid damnama reresinama nopone ya tubuġana.

nuanuaguma tabutabune, baninama natunama varinama verenama yà rarauguguyena. Be yodi taugu yà moimoiragina da Mamaitua na ġoane gavogavo i kenana, taugu sibo è vakitemina. <sup>11</sup>Taugu è ġoe guratena da sibo è kitemi da taugu puyo Arue sibo è utemi da taumi sibo koyai rewapanana, <sup>12</sup>bo deġoda taumi be taugu dà waisumäge sibo tèi kawa duġu vivirana.

<sup>13</sup>Be yà ġoēgoena da taumi sibo koya kataiena da taugu taumi ġaromie veraunama èwai nuanoġongoġotena da taugu sibo è sagumi da ġaromie banaga ġesaudima sibo ai sumāgana, nema eteni banegidima ġesaudima è sagudi be ai sumāgana maika. Be taiparapara ya morabana aubainama nam e vakitemina. <sup>14-15</sup>Taugu yà ġoēgoe kauena da vari verenama taumi Rom ġaromie yà rauguguyena, baninama inam taugu yau noyama da banaga matabudi sibo ġarodie è rauguguyana, avedi da taudi eteni bo nam eteni, katakataidi bo nam katakataidi.

### Vari verenama na wairewapanama

<sup>16</sup>Be taugu vari verenama aubainama nam aitau tenaġa ama nainaire bo ama tunitunimayaġena, baninama inam Mamaitua na rewapanama da aitaugā tawai sumāgana ei yawasanidina, noġone Jius banegidima ġarodie, be muriġa dobu ġesaudima. <sup>17</sup>Uma varinama verenama e riuriuedana da nema Mamaitua e vovo kaukauedana da tauna matane dà yawasanama e didimanana. Inam matabuna dà waisumäge e voiedina. Baninama girugiruminama porane umanama a girumina, “Didimana baneginama tauna waisumäge tokare yawasana e banavina”.

### Banaga matabuda dà gewagewama

<sup>18</sup>Mamaitua na medima marae e yovoyovona banaga matabudi aitaugā Mamaitua nam tima vivivivre be na ġoanama nam tima voivoiena ġarodie, be taudi ġarodie riukaua ta rawarawa koakoana, <sup>19</sup>baninama banaga matabudi Mamaitua na voiama matabuna a kataiena, baninama Mamaitua yaba ya voivoiedina tawai maġataridana da tauna e miamiana. <sup>20</sup>Baninama pakane be ya naġo da yodi avedi da Mamaitua e miamia moisirina be taudi yaġoro sibo a kataie da tauna e miamiana, baninama yaba matabuna ya voivoiedina, yaġoro matedie ta kitekitedina. Inam yabedima a kitedi be sibo a kataie da Mamaitua e miamiana, be na rewapanama kenakena nonoġine yaba matabuna ewai badedina. Vutuna aubainama taudi nam tokare ta gudutaraġa be teneteneġina.

<sup>21</sup>Avedi da taudi Mamaitua a kataiena be yaġoro taudi nam isanama tima kaikai suġusuġuna da tauna Mamaitua, be mate nam tima waikaiwena, taudi adi noġotama ya kovi be nopodima kupi ya moġavuna. <sup>22</sup>Taudi ta riuriuna da taudi kabe nuauyauya banegidi, be ibewa da taudi nopodima bua ya moġavuna, <sup>23</sup>baninama Mamaitua miamia nonoġinama

ma nenegarina raudununenama a gosepore, be taudi kokoitau a voiedi be a rarau duneedina. Taudi kokoitau a voiedina kitedima maika banaga, kiu, musara be musara daredaredima. Be inam yabedima matabudi waiwaikavedima Mamaitua ai gabu raupunana.

<sup>24</sup>Vutuna aubainama Mamaitua ya miatautauriedi be ya voie da adi gewagewama yai rewapanana be inam gewagewanama taudi ewai badedi da tunidima tawai uta munağedi da adi banaga mate yaba waitunimayamayağidima ta voivoiedina. <sup>25</sup>Taudi Mamaitua na riukauama a gosepore be kaiyovu tawai kawa riukauena, be yaba Mamaitua yawai tubuğidina ta rarau duneedina, be nam tauwai tubuğinama tima rarau duneena. Tauna vutuna tà kaisuğu nonoğena. Inam riukaua!

<sup>26</sup>Vutuna aubainama Mamaitua adi gewagewae ya goseporedina. Be yodi waiwaivi adi babadama a gosağā be a nağō da adi banagama waiwaividima mate tawai kawa soğana.<sup>b</sup> <sup>27</sup>Be inam nama kauinama teneğine, tautaugoma adi waiwaivima a gosedi be a nağō adi banagama tautaugomidima mate tawai kawa soğana. Naumeki da taudime tubuğidie adi kovoğama a pağona, adi voia waigewama aubainama.

<sup>28</sup>Naumeki taudi Mamaitua a gosena, vutuna aubainama Mamaitua ya miatautauriedi be ya voie da adi noğotama gewegewedima yai rewapanana, be adi gewagewama taudi ei badedi da tunidima tawai uta munağedi be adi banagama mate yaba waitunimayamayağidima ta voivoiedina.

<sup>29</sup>Taudi gewagewa be barabara matedima tabu be tabu tauvoienama banegidima. Taudi nopodima waigogo, gewagewa, waikwina, rauvunuğā, iğara, waiwavu kiroğā, gadoğai, nopo pikapika, inam yabedima matabudi nopodima ya moğavuna. Taudi tawai karakarakutu, <sup>30</sup>be giu gewegewedie adi banagama tawai giuguedina, be Mamaitua tautuağaienama, be nopodima meditupo, seğara, be taudi banaga taukita tuağaiedima, be taudi yaba gewegewedima nopodie tawai tubuğidina. Be adi dosima ta rawarawa ğaigaiedina. <sup>31</sup>Be taudi nam debedi, taudi nam waisumağā banegidi, taudi nam raunuatoi banegidi, be taudi inam biwa taupağonama. <sup>32</sup>Avedi da taudi Mamaitua na tarawatuma a kataiena, da taudi aitaüğa nama ta voivoiana tokare guri ta kita sağena. Be yağoro nama ta voivoiana. Be banaga ğesaudima aitaüğa uma yabedima tauvoiedima taudi mate adi banagama a kitedi be tawai aninedina.

### Mamaitua na etarama

**2** <sup>1</sup>Değoda tam banaga ğesaudima gewagewa ta voivoie be kwa riuriu matai ġomedina, naumeki tamğā kwa kawakawa gewagewamna, baninama tam uma yabedima mate kwa voivoiedina. Vutuna aubainama

<sup>b</sup> 1.26 Uma kauidima inam badara na waidirima.

tam nam teneteneğina da kwa gudutara munağem. <sup>2</sup> Be tauma kè kataie da Mamaitua uma banegidima, aitaúga uma yabedima nama ta voivoiedina taudi tokare e kovoğidina. Be tauna na etarama inam riukaua. <sup>3</sup> Yau tura, tam banaga ġesaudima gewagewa ta voivoie be kwa sağasağaidina, be tam mate uma yabedima kwa voivoiedina. Tam kwa noğonogötina tokare Mamaitua na kovoğama nam kwa pağō, bo? <sup>4</sup> Tam Mamaitua na kiviverema kuya kitatuağai, bo? Mamaitua sibo ya kovoğimna, be tauna kivinama ya verena aubainama rağan ewai rauriena da tam am noğotama kwa vitarena. Vutuna tam nam ku kataie, bo?

<sup>5</sup> Be baninama tam am nopoladoma be nopolome nam kuma kuvekuvesana, aubainama Mamaitua na medima ġarome kwawai potona na medima rağanine. Inam rağanine Mamaitua na kovoğama riuriukauinama ei mağatarina. <sup>6</sup> Tauna banaga tenatenağāga aba a voivoiedina, ruvane nama tokare e utedina. <sup>7</sup> Aitaúga rağan matabuna Mamaitua na ġoanama ta voivoie, be uma kauidima, neneğara, vivira, be yawasana kenakena nonoğinama ta wanewanedina, taudi tokare yawasana kenakena nonoğinama e utedina. <sup>8</sup> Be banaga ġesaudima, taudiğā adi ġoanama ta voivoiedina, taudi inam riukaua ta tuağāiedi be gewagewa kededima tawai muriwatanedina, taudi tokare medi be kovoğā ta banavidina. <sup>9</sup> Piripiri be nuaboya banaga matabudi, aitaúga gewagewa ta voivoiedina ġarodie. Noğone Jius banegidima ġarodie, be muriğā eteni banegidima ġarodie mate. <sup>10</sup> Be ġesaudima neneğari, vivira be suba, banaga matabudi, aitaúga vere ta voivoiedina ġarodie. Noğone Jius banegidima ġarodie, be muriğā eteni banegidima ġarodie mate. <sup>11</sup> Baninama Mamaitua taudi matabudi ewai nuapağōedina aubainama.

<sup>12</sup> Aitaúga Mousis na tarawatuma nam ġarodie, be gewagewa ta voiena, taudi mate tokare kovoğā ta banavidina, avedi da taudi tarawatu nam ġarodie. Be aitaúga Mousis na tarawatuma ġarodie be gewagewa ta voiena, taudi mate tokare kovoğā ta banavidina, maika tarawatu nopolne ya girugirumina nama. <sup>13</sup> Baninama Mousis na tarawatuma tauwai beavaienama taudi nam Mamaitua matane didimanidi, ibewa da aitaúga Mousis na tarawatuma tawai beavaie be ta voivoiena, taudi Mamaitua matane didimanidima. <sup>14-15</sup> Avedi da banaga ġesaudima taudi nam Jius, be Mousis na tarawatuma nam ġarodie, be yağoro tarawatu aba ya riuriuena, nama ta voivoiena. Inam ewai mağatarana da taudi nopolne tarawatu e kenakenana, baninama Mamaitua nopolne tarawatu ya girumina. Vutuna aubainama adi noğotama e riuriuedina da değō tauna vere be değō tauna gewagewa. <sup>16</sup> Be uma kovoğinama tokare e tubuğana rağanine, Mamaitua banaga adi noğotama waimoisiridima, e etaredina Yesu Kerisoe. Yau varima verenama mate nama e riuriuna.<sup>c</sup>

<sup>c</sup> 2.16 Vers 16 inam vers 12 e raraū dudutainina.

### Mataira ġavoe be nopoe

<sup>17</sup>Be tam ġesaumma nemanama? Tam kwa riuriu munaġem da tam kabe Jius banegim, be kwa noġonoġotina da yaba matabuna ġarome naumeki, baninama tam Mamaitua na tarawatuma ġarome, be tam kwa seġaseġarana da tam Mamaitua tura kaukauinama. <sup>18</sup>Tam Mamaitua na ġoanama kuya kataiena, be tam tarawatu ġarone katai kuya paġona da tam teneteneġinama da sibo didimana kuya voiena. <sup>19</sup>Be tam kwa noġonoġoti da banaga Arue matapotepeṭedima adi tauwai kedadokama be aitauga kupie miemienidima adi kodamma tam. <sup>20</sup>Be mate kwa noġonoġoti da tam banaga buebuedima tauboru waididimanidima, be tam seda ġauġaubodima adi tauwai katakataima. Inam riukaua, baninama tam Mamaitua na tarawatuma ġarome aubainama, tam Mamaitua na kataima be na riukauama kuya kataiena.

<sup>21</sup>Inam naumeki, tam banaga ġesaudima kwawai katakataidina, be aba aubainama tamġa nam kumawai katakatai munaġem? Banaga ġesaudima kwa riuriuedi da nam ta danene, be aba aubainama tam mate kwa danedanene? <sup>22</sup>Banaga ġesaudima kwa riuriuedina da nam adi waiwaivi bo adi tautauġomama debedie mui ta poraġa, be aba aubainama tam mate nama kwa voivoia? Tam kokoitau kwa riuri tuāġaiedina, be aba aubainama tam mate kokoitau kwa rauduneedi? <sup>23</sup>Tam tarawatu kwa seġaseġarena, be yaġoro tam Mamaitua isanama kwa kawakawa gewagewana, baninama na tarawatuma kwawai kati kotovina! <sup>24</sup>Banaga matabudi dobu ġesaudie Mamaitua tawai diboġina, baninama taumi kami taiye. Girugiruminama poranama nopone e riuriuna maika.

<sup>25</sup>Inam ami vaivaima da kopitom ko voivoiena, inam naumeki, be deġoda taumi tarawatu ko voteyeteyena inam ya vere kauana. Be deġoda tarawatu koi kati kotovina, inam vaivainama kopitom nam baniboruboruna. <sup>26</sup>Be deġoda banaga ġesaudima nam kopitom ti paġona be yaġoro tarawatu ta vovo teyeteyena, inam taudi Mamaitua matane maika kopitom banegidima. <sup>27</sup>Uma banegidima nam kopitom ti paġona be yaġoro tarawatu ta vovo teyeteyena, taudi tokare tam ta saġaiġomem, be ta riuemna, “Avedi da tam tarawatu be kopitom kuya paġona, tam tokare nam kwa yawasana, baninama tam tarawatu tauwai katikotovidima.”

<sup>28</sup>Nam aitau ei rawa-Jius deġoda tauna Jius adi vaivaima e voivoiena. Be kopitom nam tubuġe taunaġa. <sup>29</sup>Riukaua Jiusnama matairinama inam nam tubuġe, ibewa da nopoe. Be kopitom tubuġe inam kavakavanama, baninama inam tarawatu na noyama. Be deġoda nopolama kopitom e paġona inam naumeki, baninama inam Arua na noyama. Inam nama baneginama tauna Mamaitua na kaisuġusuġuma e wanewanena, be nam banaga adi kaisuġusuġuma ima wanewanena.

### Mamaitua banaga matabudi e etaredina

**3** <sup>1</sup>Vutuna aubainama Jius be kopitom adi verema aba? <sup>2</sup>Adi verema inam a toi kauana, baninama Mamaitua riunama Jius ya ute dokedina.

<sup>3</sup>Be ġesaudima taudi nam Mamaitua nuanama taupaġonama banegidi. Tam kwa noġonoġotina da Mamaitua inam banegidima nam ei nuapaġoedi, bo? <sup>4</sup>Ibewa ġoma! Mamaitua na saugama e kaikaididina, avedi da tauda banaga kaikaiyovudama, dà saugama tħawī kat i kotovidina. Baninama girugiruminama porane umanama ya riuna, “Banaga ta kita da raġan matabuna Mamaitua tam am giuma kwa giugiuna matabuna inam didimanine, riukaue.”

<sup>5</sup>Be banaga ġesaudima ta riuriuna, “Naumeki, deġoda nama, tauda dà gewagewama ya vere kauana, baninama dà gewagewama kana taiye Mamaitua e tainoġoti da tauna dà gewagewama e noġota porena, inam kedane na saugama e kaikaididina. Vutuna aubainama inam nam i verena da Mamaitua sibo ġarode nuanama yai medi.” <sup>6</sup>Ibewa, inam nam nama! Deġoda nama e tubuġana, tokare nema Mamaitua dobu matabuna e etara bake? <sup>7</sup>Be uma banegidima ta riuriuna, “Tauda dà yawasanama kaikaiyovudie banaga Mamaitua na riukauama ta kaikai suġġuna, tokare aba aubainama Mamaitua sibo e kovoġida? Inam nam i verena, <sup>8</sup>agunai gewagewa tħaġiġi be Mamaitua tħaġiġi be kaigurate.” Inam banegidima tħawī tupakaiyovuna da taġu kabe nama e raraugħ gugħi. Ya verena da taudi tokare kovoġa ta paġo.

### Nam aita tenaġa didimana banegina

<sup>9</sup>Be yodi nemanama? Tauma Jius veremai, nam banaga ġesaudima maika, bo? Ibewa! Baninama kaite ē riuna da Jius be banaga ġesaudima matabudi gewagewa banegidima. <sup>10</sup>Maika girugiruminama porane ya riuriuna nama,

“Nam aita tenaġa didimana banegina,  
naumeki ibewa ġoma.

<sup>11</sup>Be nam aita tenaġa nuauyauya banegina,  
be nam aita tenaġa Mamaitua na kedama ima wanewanena.

<sup>12</sup>Matabudi Mamaitua a mia tauturiena,  
be yodi matabudi nam banibiribiridi.”

<sup>13</sup>“Taudi gayedima kokoaga gayedima maika be adi giuma  
kaikaiyovudi be gewegewedima.” “Taudi menedima maika mota  
sarama.”

<sup>14</sup>“Taudi mududie waitaratautau be nopolima nuaġoraġora ya  
moġavuna.”

<sup>15</sup>“Taudi tauwai guri makai banegidima,

<sup>16</sup> be adi yawasanae raukivigewagewa be nuaboya ya moğavuna,

<sup>17</sup> be suba kedanama nam ti kataiena.”

<sup>18</sup> “Taudi Mamaitua nam tima vivivivirena.”

<sup>19</sup> Yodi tè kataiena da aitauga tarawatu ewai badedina taudi sibo tarawatu matabuna a voteyeteyedina. Vutuna aubainama taudi tokare nam ta gudutara be teneteneğina. Be ibewa da banaga dobu matabuna nōpone Mamaitua na etarae tà miamiana. <sup>20</sup> Vutuna aubainama aitauga tarawatuğa tawai muriwatanena taudi Mamaitua matane nam didimanidi. Baninama tarawatu nam e voie da tauda didimana tà banavi, ibewa be tarawatu na noyama inam ei kataidana da dego tauna gewagewa be dego tauna vere.

### Didimana inam waisumağe

<sup>21</sup> Be yodi didimana kedanama Mamaitua yai mağatarina inam ġavoe, be nam tarawatue. Be peroveta be tarawatu uma kedanama vaunama ai matematena. <sup>22</sup> Yodi Mamaitua banaga e kawa didimanidina, aitauga Yesu Keriso ġarone tawai sumağana, avedi da tauda noğone banaga vereda bo gewagewadama, <sup>23</sup> baninama banaga matabuda gewagewa tè voienna aubainama nam teneteneğina da Mamaitua ġarone sibo tè tava.

<sup>24</sup> Vutuna aubainama Mamaitua na raukivivere ya kawa didimanidana be inam kawa didimaninama ya ute yababedana, nam maesa mate. Nama e voivoiana, baninama Yesu Keriso yai yawasanidana. <sup>25</sup> Mamaitua Yesu Keriso ya vine be ya guri da kosininama ya rauğini da banaga matabuda dà gewagewama e koğa porena değoda tài sumağena. Inam kedane Mamaitua yai kataidana da tauna didimaninama, baninama boni tauna banaga adi gewagewae ya kitakita poredina be nam i kovokovogidina. Be yodi inam gewegewedima Yesu kosinine yai maesidina. <sup>26</sup> Be mate Mamaitua yai kataiedana da tauna didimaninama, baninama yodi rağanine banaga aitauga Yesu tawai sumağena, taudi matabudi Mamaitua e kawa didimanidina.

<sup>27</sup> Be yodi teneteneğinama da sibo tauda tè seğarana, baninama tè yawasanana aubainama, bo? Ibewa! Baninama yawasana tè pağona nam dà noyama veredima aubaidi, ibewa da waisumağe Yesu Keriso ġarone yawasana tè pağona. <sup>28</sup> Vutuna aubainama tauma ka riuriuna da banaga yawasana e pağopağona inam waisumağe, be nam dà noyama veredima aubaidi.

<sup>29</sup> Mamaitua tauna tenağga, Jius be eteni banegidima adi Mamaituama.

<sup>30</sup> Baninama Mamaitua tenağga aubainama, tauna Jius be eteni banegidima e kawa didimanidina, inam waisumeğinama teneğine.

<sup>31</sup> Be ya riuriuna da waisumağe inam ya sağga guratana. Be yodi nemanama, tarawatu nam baniboruboruna, bo? Ibewa, waisumağe inam tarawatunama tà vovo teyeteyena.

### Eibraham na waisumağe Mamaitua tauna ya kawa didimanina

**4** <sup>1</sup>Eibraham tauna bonimai tamamaima. Be uma giudima ġarodie aba tauna ya banavi? <sup>2</sup>Deġoda Eibraham na noyama veredie Mamaitua i kawa didimanina, naumeki da banaga matedie sibo ya segarana be nam Mamaitua matane. <sup>3</sup>Baninama girugiruminama poranama umanama ya riuna, “Eibraham Mamaitua yai sumaġena, vutuna aubainama Mamaitua ya kawa didimanina”.

<sup>4</sup>Raġanine banaga e noyanoyana, tauna na maesama e paġopaġona, inam nam tà riuna ‘puyo’. Ibewa da tauna ya noyanoyana maesinama e paġopaġona. <sup>5</sup>Be Mamaitua ġarone inam na tabu. Banaga aitau nam ima noyanoyana, be Mamaitua banaga gewegewedima taukawa didimanidima e waisumaġena, tauna na waisumaġama aubainama Mamaitua tauna ei yawasanina.

<sup>6</sup>Be Deivid uma giunama teneġinama ya giuena da nuavere baneginama aitau Mamaitua e kawa didimana yababena, be nam na noyama maesina. <sup>7</sup>Tauna umanama ya riuna,

“Nuavere taudi aitaūga adi voia waigewama ya noġota poredina be adi gewagewama ya tauriedina.

<sup>8</sup> Be nuavere tauna aitau na gewagewama tokare Bada nam e noġota watane”.

<sup>9</sup>Uma giunama Deivid ya giugiuena Jius banegidima aitaūga kopitom a paġopaġona taudīga aubaidi bo banaga ġesaudima kopitom nam ti paġona mate aubaidi? Aba taugu è riuriена ko noġoti! Mamaitua tauna Eibraham na waisumağe ya kawa didimanina. <sup>10</sup>Be airaġan Mamaitua Eibraham ya kawa didimani? Noġone kopitom ya paġo doke bo muriġa da kopitom e paġona, be Eibraham ya kawa didimani? Ibewa! Noġone Mamaitua Eibraham ya kawa didimani dokena, muriġa da kopitom ya paġona.

<sup>11</sup> Be inam kopitomnama ya paġona, baninama inam yai matairana da tauna noġone didimana ya paġona na waisumaġama aubainama. Tauna muriġa da kopitom ya paġona, be noġone Mamaitua tauna ya kawa didimana dokena. Vutuna aubainama banaga matabudi aitaūga kopitom nam ti paġona, be tawai sumaġana, taudi tamedima inam Eibraham, be Mamaitua inam banegidima ya kawa didimanidina. <sup>12</sup>Be tauna inam kopitom banegidima mate tamedima, taudi nam kopitom taunaġa ti paġona, ibewa da waisumaġa mate. Baninama inam waisumegħinama teneġinama tamadama Eibraham ġarone be muriġa da kopitom ya paġona.

### Mamaitua na saugama waisumağe tà paġona

<sup>13</sup>Mamaitua ya saugana da Eibraham na parate da nokoi ya naġona natunatunama tokare dobu matabuna tai buderieni. Nama Mamaitua

Eibraham ya riuena, baninama Eibraham na waisumağama aubainama, be nam tarawatu, ibewa. Tauna na waisumağe Mamaitua ya kawa didimani be inam sauginama ya utena.<sup>14</sup> Be değoda Mamaitua na saugama aitaüğa tarawatu tauvoteyeteyenama i utedina, naumeki da waisumağa inam nam baniboruboruna, be na saugama inam kavakavanama.<sup>15</sup> Baninama tarawatu e voivoie da Mamaitua nuanama ewai medina tauda dà rawağaiğaima aubainama. Be değoda tarawatu nam e kena, tokare nam teneğinama da tà rawağaiğai.

<sup>16</sup> Uma vutuna aubainama aitaüğa tawai sumağana, Mamaitua ei yawasanidina. Inam kauine Mamaitua yawasana e uteute yababedana. Be Eibraham natunatunama matabudi riukaua da Mamaitua na saugama ta pağıona, nam tarawatu tauwai muriwatanenama taudiğä, ibewa da aitaüğa tawai sumağana maika tamadama Eibraham, taudi mate sauga ta pağıona.<sup>17</sup> Girugiruminama porane umanama ya riuna: “Taugu è voiem da tam dam toitoi tamedima.”

Vutuna aubainama Eibraham tauna matabuda Tamadama Mamaitua matane, baninama tauna Mamaitua yawai sumağena. Mamaitua tauna yai rewapanan kauana. Tauna banaga guriguridima ei yawasanidina, be tauna yaba nam adi kaba tubuğä, be mudune e vatodi da ta mağamağatarana.

<sup>18</sup> Eibraham yai sumağä be ya noğotadidina, avedi da nam sibo ya tubuğä, be yağoro nama ya tubuğana. Da tauna dam toitoi tamedima, maika Mamaitua ya riuriuena nama, “Am damma tokare ta toina, maika kipora.”

<sup>19</sup> Eibraham ya kataie da tauna ǵaubonağä sibo ya gurina, baninama tauna kaite na modima 100 a kovina. Be na visarama Sera yai kaikaipoki be kaiteka yai rawa dosina. Be yağoro Eibraham Mamaitua na saugama yai sumağena da tokare na visarama Sera ei natunana,<sup>20</sup> be tauna Mamaitua na saugama nam i noğota bekubekuena. Ibewa da na waisumağama yağoro yai rewapanan kauana, baninama tauna Mamaitua ya kaikai suğuna.<sup>21</sup> Be Eibraham ya katai kauena da Mamaitua aba ya sausaugenä tokare teneteneğinama da e voienna.<sup>22</sup> Baninama Eibraham na waisumağedidima Mamaitua ǵarone ya boruna, vutuna aubainama Mamaitua Eibraham ya kawa didimanina.

<sup>23</sup> Uma giudima, “Mamaitua Eibraham ya kawakawa didimanina nam taunağä aubainama ti girumina”,<sup>24</sup> ibewa da tauda mate. Baninama Mamaitua dà badama Yesu, guriguridima nopodie, be ya kawa midisüğu munağena. Değoda tài sumağena, tauda mate e kawa didimanidana.

<sup>25</sup> Yesu tauna dà gewagewama aubaidima ai gurina. Be tauna gurie ya midisüğu munağä da tauda e kawa didimanidana, Mamaitua ǵarone.

### Mamaitua be tauda poude suba e kenakenana

**5** <sup>1</sup>Yodi Bada Yesu Keriso dà waisumağe tauda ya kawa didimanidana, vutuna aubainama yodi tauda be Mamaitua poude suba e

kenakenana. <sup>2</sup>Dà waisumaḡama aubainama Yesu Kerisoe tè verau be inam raukiviverenama Mamaitua ḡarone tè paḡona. Be yodi ma mosarida tàwai rabana da Mamaitua neneḡarinama e utedana.

<sup>3</sup>Nam inam vutunaḡa, be mate tài nuaverena dà wainuatoitoie, baninama tè kataiena da wainuatoitoi e voie da tokare tauda tà kaiguratena. <sup>4</sup>Be kaigurata e voie da tokare tauda tài rewapanan kauana. Be rewapanan e voie da waisumaḡedidi e tubuḡana. <sup>5</sup>Be uma waisumaḡedidinama aubainama tokare nam tài nuaboya, baninama Mamaitua na wainuapaḡoma Arua Babaue nopode ya ḡini porena, baninama tauna Arua Babau ya utedana.

<sup>6</sup>Raḡanine tauda yaḡoro gewagewae tè miamiana, tauda inam Mamaitua na ḡaviamma. Be raḡan boruborune Keriso ya gurina aubaidama. <sup>7</sup>Banaga deḡoda tokare turanama tenaḡa verenama aubainama e gurina. <sup>8</sup>Be Mamaitua na wainuapaḡoma ḡarode yai maḡatarina, inam tauda yaḡoro gewagewae be Yesu aubaidama ya gurina. <sup>9</sup>Tauna kosinine tauda ya kawa didimanidana Mamaitua ḡarone. Vutuna aubainama yodi tè katai kauena da Mamaitua na medie Yesu tokare ei yawasanidana. <sup>10</sup>Raḡanine tauda yaḡoro Mamaitua na ḡaviamma, be natunama Yesu na gurie ya voie da tauda Mamaitua mate yai rawateḡei munaḡedana. Be natunama Yesu na yawasanama e voie da tauda yawasana dosinama tè paḡona, baninama yodi tauda Mamaitua na banagama aubainama. <sup>11</sup>Be nam inam yabediḡa, be mate tài nuaverena Mamaitua ḡarone, baninama tauna Yesu Kerisoe tauda yodi Mamaitua tè turanena.

### Adam be Keriso

<sup>12</sup>Gewagewa dobue ya verauna, inam banaga tenaḡa kana taiye be uma gewagewane guri dobue ya verauna. Uma kauine guri banaga matabudi ḡarodie ya verauna, baninama matabudi gewagewa a voienna. <sup>13</sup>Gewagewa dobue ya kenakena be muriḡa tarawatu ya dobina. Be Mamaitua gewagewa ya kita poredina, inam raḡandie tarawatu nam i kenakenana. <sup>14</sup>Be yaḡoro Adam na raḡanie be ya naḡo da Mousis na raḡanie guri banaga yawai badedina. Avedi da aitauḡa tarawatu nam ti kati kotovina, Adam tarawatu yai kati kotovina maika. Adam tauna banaga muriḡa e verauna yawai matairena. <sup>15</sup>Be taudi rabui adi yawasanama nam teġenidi, baninama Mamaitua na puyoma nam maika Adam na gewagewama nama. Inam baneginama Adam na gewagewae banaga toitoi a gurina. Be Yesu Keriso tauna Mamaitua na raukiviveree noḡotaporaḡa ya verauḡena banaga toitoi ḡarodie. <sup>16</sup>Mamaitua na puyoma be Adam na gewagewama nam tai ruvaruva be teneteneḡina. Baninama Mamaitua na puyoe banaga toitoi ya kawa didimanidina, avedi da taudi gewagewa toitoi a voiedina. Be Adam na gewagewae banaga

toitoi ta gurigurina. <sup>17</sup>Uma baneginama tenaṅga Adam na gewagewae, guri banaga matabudi yai badedina. Be banaga matabudi aitaugā Mamaitua ġarone noġotaporaġa puyonama dosinama tai anine be ta paġona, taudi tokare Yesu Keriso mate yawasana tai badedina.

<sup>18</sup>Vutuna aubainama Adam gewagewa tenaṅga ya voiena aubainama, banaga matabudi a gurina, be Yesu didimana tenaṅga ya voiena aubainama, banaga matabudi Mamaitua ya kawa didimanidina da yawasana tà banavina. <sup>19</sup>Be kauinama teneġine Adam na rawaġaiġaima aubainama, banaga matabudi gewagewa ya ragaudina, be Yesu na voteyateyama aubainama banaga toitoi Mamaitua e kawakawa didimanidina.

<sup>20</sup>Mamaitua tarawatu ya utedana, baninama dà gewagewama na morabama ei maġatarina. Be deġoda gewagewa e morabana, naumeki da Mamaitua na raukiviverema e moraba vavasaġana. <sup>21</sup>Vutuna aubainama gewagewa gurie ewai badana, be teneġinama yodi Mamaitua na raukiviverema didimanae ewai badana, be yawasana kenakena nonoġinama tà paġona Yesu Kerisoe, tauna dà badama.

### Tauwai sumaġa be gewagewa

**6** <sup>1</sup>Be yodi nema tà voia bako? Gewagewa tà kaigurate be Mamaitua na raukiviverema e moraba, bo? <sup>2</sup>Ibewa ġoma! Tauda gewagewae tè guri be yodi nemanama gewagewae tà mia bako? <sup>3</sup>Ko noġonoġoti bo ibewa da tauda aitaugā Yesu Kerisoe tè babataitona, tauda yodi matabuda tè babataitona Yesu Keriso na gurima nopone. <sup>4</sup>Vutuna aubainama babataitoe tauda Yesu mate a dobodana. Be tauna gurie ya midisuġu munaġana Mamaitua na rewapanama neneġarine. Be inam rewapaninama teneġine tauda mate, yawasana vaune tà mianana.

<sup>5</sup>Tauna na gurie tauda tauna mate tenaṅga. Vutuna aubainama na kaba midisuġue tauda tauna mate tenaṅga. <sup>6</sup>Baninama tè kataiena da tubuġidama poranama Yesu mate a tuparatu tenaġena. Vutuna aubainama tubuġidama gewagewa tauwai nuapaġoenama yodi na rewapanama ya kovina, be tauda nam gewagewa ġarone tài yaraga munaġa, <sup>7</sup>baninama aitau da e gurina, gewagewa nam tauna e taukonī munaġe. <sup>8</sup>Be tauda tè kataiena da tauda Keriso mate tè gurina aubainama, Keriso mate tokare tà miana. <sup>9</sup>Be mate tè kataie da Keriso ya midisuġu munaġana, tokare nam e guri munaġa, baninama guri nam na rewapanama Yesu ġarone ima kenakenana. <sup>10</sup>Be Yesu tauna raġan tenaṅga kava ya gurigurina, gewagewa na rewapanama yai kovina. Be yodi tauna na yawasanama Mamaitua na yawasanae e miamiana. <sup>11</sup>Vutuna aubainama taumi mate ko noġotimi da taumi gewagewae koya gurina, be Yesu Kerisoe ami yawasanama Mamaitua na yawasanae ko miana.

<sup>12</sup>Vutuna aubainama nam gewagewa koi anine da tubuġimima ei bade. Uma tubuġinama tokare e gurina. Nam gewagewa taumi e sorumi

da taumi tubuḡa na ḡoanama gewegewedima koi muriwatanedi. <sup>13</sup>Nam tunimima aiyabinama koi anine da gewagewa ta voiedi. Be ibewa da ko ute munaḡemina Mamaitua ḡarone, baninama taumi gurie be koya naḡona yawasanae. Vutuna aubainama yodi tunimima matabuna Mamaitua ko ute be koi anine da tunimima vutuna vere ta voiedina. <sup>14</sup>Naumeki da yodi gewagewa nam ei bademi, baninama taumi nam tarawatu na waibadae koma miamiana, ibewa da taumi Mamaitua na raukiviverema na waibadae ko miamiana.

### Tauda yodi nam gewagewa ei yarageda

<sup>15</sup>Be yodi aba tà voie? Tauda Mamaitua na raukiviverema na waibadae tà miamiana, be nam tarawatu na waibadae tama miamiana. Vutuna aubainama yodi gewagewa tà voie, bo? Ibewa ḡoma! <sup>16</sup>Koya kataie bo ibewa da taumi aitau ko voteyeteyena taumi inam tauna na taunoyama? Vutuna aubainama deḡoda taumi gewagewa na taunoyama, taumi tokare ko gurina. Be deḡoda taumi Mamaitua ko voteyeteyena, taumi tokare Mamaitua na taunoyama be tauna ei yawasanima. <sup>17</sup>Taumi raḡan tenaḡa gewagewa yawai yaragmina, be Mamaitua tài kaiwena da yodi nuemima tabutabunama koya vitaredi be riukaua waikatakatainama yai katakataimi be taumi ko vovo teyetededina. <sup>18</sup>Taumi gewagewae be Bada ya kaiporemi da yodi riukaua na yarayaragama.

<sup>19</sup>Taumi ami noḡotama vovo gwaḡegwaḡedima aubainama, yau giuma teketedie yà giugiuna da taumi ko kataiena. Boni tunimima koyai utaedi da mira be gewagewa dosidima ḡarodie awai yaragana. Inam nama yodi tunimima koi utaedi da yaba didimanidima ḡarodie tai yaragana yawasana babaunama aubainama.

<sup>20</sup>Taumi gewagewa ḡarodie koyawai yaragana raḡandie, taumi didimana nam ko noḡonoḡotidina. <sup>21</sup>Inam yabedima koya voivoiedina yodi kowai kawa tunimayaḡedina, damodie aba koya banavi? Nam aiyaba da naumeki guri! <sup>22</sup>Be yodi taumi gewagewae be Bada ya kaiporemina da taumi yodi Mamaitua na taunoyama. Vutuna aubainama yodi taumi teneteneḡinama da Mamaitua na ḡoanama ko voiedina, yodibe taumi tokare koi rawa babau be damone taumi yawasana kenakena nonoḡinama ko paḡona. <sup>23</sup>Baninama dà gewagewama na maesama inam guri, be Mamaitua na puyoma inam yawasana kenakena nonoḡinama, dà Badama Yesu Kerisoe.

### Raḡanine banaga e gurina tarawatu na rewapanama nam ḡarone ima kenakenana

**7** <sup>1</sup>Yau bana, tarawatu ko noḡoti. Banaga e miamiana, inam raḡanine tarawatu tauna banaga ewai badena. <sup>2</sup>Inam maika waivi wainaḡinama. Raḡanine tauḡoma yawayawasaninama e miamiana, inam

rağanine waivi nam teneteneğina da na tauğomama e gose. Be değoda na tauğomama e gurina, inam rağanine tauna wainağı tarawatunama e dobidobi porena. <sup>3</sup>Vutuna aubainama değoda na tauğomama yawayawasaninama e miamia be waivi tauğoma ġesaunama e naġina, tauna na badama debane mui e poreporena. Be değoda na tauğomama e guri be waivi tauğoma ġesaunama e naġina, inam naumeki.

<sup>4</sup>Yau bana, uma kauinama teneğinama taumi mate ġaromie. Taumi Keriso mate koya guri tenaġana! Vutuna aubainama tarawatu na rewapanama ġaromie nam ima kenakenana. Keriso gurie be ya midisūgu munägħana, be taumi yodi tauna ġaroġaronama, da taumi ko votana Mamaitua aubainama. <sup>5</sup>Rağanine tauda tubuġa yawai dokedana noġota gewegewedima dà yawasanae a noyanoyana. Uma noġotidima gewegewedima tarawatue a maġatarana. Vutuna aubainama tauda boni dà votavotama guri a tubutubuġana. <sup>6</sup>Baninama tauda Yesu mate tè gurina aubainama, tauda yodi tarawatu na rewapanae be Yesu ya kuvesidana. Vutuna aubainama yodi keda vaunama Arue tà noyana, be nam keda poranama tarawatu a girugirumina tà noye.

### Tarawatu be gewagewa

<sup>7</sup>Yodi aba tà giue? Tarawatu taunaġa inam gewagewa, bo? Ibewa ġoma! Taugu tokare nam sibo gewagewa e kataie, ibewa da tarawatu ewai maġatarana. Baninama taugu tokare waikwina nam e kataie, değoda tarawatu nam sibo i riuna, “Nam kwai kwina!” <sup>8</sup>Gewagewa na kedama tarawatue ya banavi be ya voie da nogue waikwina noġotidima ta tavatavana da tarawatu yàwai kati kotovina. Baninama değoda tarawatu nam sibo i kenakena, tokare gewagewa na rewapanama yai kavena maika banaga gurigurinama.

<sup>9</sup>Rağanine taugu ġaubogue taugu tarawatu nam e kataiena, taugu ma nuaveregu yawasanae è miamiana. Be muriġa tarawatu è paġopaġona rağanine, gewagewa ya naġo midisūgu be yau yawasanae ya saġħana.

<sup>10</sup>Dabudine è kataie da taugu è gurina. Tarawatu kabe yawasana i uteutegu da tauna guri ya uteguna. <sup>11</sup>Gewagewa na kedama tarawatue ya banavina, vutuna aubainama ya kaiyovuegu be inam tarawatune yai guriguna. <sup>12</sup>Be tarawatu taunaġa inam babaunama. Be uma riuvavasaġinama, “Nam kwai kwina” tauna mate babaunama, didimana be vere.

<sup>13</sup>Naumeki, değoda tarawatu inam yaba verenama, inam yabanama verenama ya voie da taugu e guri, bo? Ibewa ġoma! Gewagewa uma tarawatunama verenama ya paġo be tarawatune yai guriguna. Be tarawatue yodi tà kitakitana da gewagewa inam naumeki gewagewa vavasaġinama.

### Gewagewa banaga ewai badedina

<sup>14</sup>Tauda tè kataiena da tarawatu inam Mamaitua ġarone be ya yovona. Be tauda banaga tarawatu waimuriwatanenama tè gwaġħana

aubainama, gewagewa tauda ewai badedana. <sup>15</sup> Be yaba barebaredima yà voivoiedina, taugu nam e kataiena da aba aubainama yà voivoiedi. Taugu yaba veredima è ëgoëgoedina sibo è voiedina, be yabedima nam ama voivoiedina. Be taugu yaba yau kaba tuañgainedima, vutudi taugu yà voivoiedina. <sup>16</sup> Be deñoda yaba barebaredima nam ama ëgoëgoedina, be taugu yà voivoiedina, inam taugu yàwai aninana da tarawatu inam riukaua. <sup>17</sup> Vutuna aubainama nam taugu inam yabedima barebaredima ama voivoiedina, ibewa da gewagewa nogue e kenakenana, tauna vutuna e voivoiedina.

<sup>18</sup> Baninama è kataie da nogue nam aba verenama ima kenakenana. Nogue ëgoana riukaua da e kenakenana da vere sibo è voieno, be nam rewapano ëgarogue da yà voie. <sup>19</sup> Baninama yaba yà voivoiedina, taudi nam yau ëgoana da sibo è voiedi. Be yaba voiedima nam yau kaba ëgoedi, inam yabedima yañgoro da yà voivoiedina. <sup>20</sup> Be deñoda yaba yà tuatuañgainedina, be yañgoro yà voivoiedina, inam kauidima tawai kataigu da nam taugu inam yabedima ama voivoiedina, be ibewa da gewagewa nogue e kenakenana, tauna vutuna e voivoiedina.

<sup>21</sup> Dobudine è kita da rañgan matabuna inam umanama e tubutubuñgana: Rañganine è raurubu da kabe vere è voivoie, da gewagewa è voivoieno. <sup>22</sup> Naumeki nogue Mamaitua na tarawatumma yà ëgoëgoe kauena, <sup>23</sup> be Mamaitua na tarawatumma nogue e kenakenana. Be taugu è banavi da tarawatu ëgesaunama tunigue yai rewapano vavasaña be e panipaniguna, be Mamaitua na tararawatumma ewai ëgavieno. <sup>24</sup> O kapore, wainuatoitoiguma! Aitau e kaisagugu, be tubuña uma gurigurinama yà gose pore? <sup>25</sup> Baninama nogue taugu Mamaitua na tarawatumma yà vovo teyeteyena, be tunigue taugu gewagewa na tarawatumma yà vovo teyeteyena. Be Mamaitua yà kaiwena, baninama taune dà Badama Yesu Kerisoe ya kuvesiguna.

### Yawasana vaunama Arua Babaue

**8** <sup>1</sup> Vutuna aubainama taudi aitañga Yesu Kerisoe ta miamiana, taudi tokare nam kovoña ta banavi. <sup>2</sup> Baninama tarawatu Arua Babaue vutuna yawasana Yesu Kerisoe ya uteguna da gewagewa be guri adi tarawatue ya kuvesiguna. <sup>3</sup> Tarawatu nam teneteneñina da sibo yai yawasanida, baninama tauda tarawatu waimuriwatanenama ëgarone tè gwaña kauana. Vutuna aubainama Mamaitua Natunama ya riupore yovoña be tubuña ya utena maika, tauda tubuñidama gewagewa tauvoienama. Be Mamaitua Yesu tubuña ya utena, be inam tubuñine tauda dà gewagewama kovoñinama ya pañona, be yodi ëgarode gewagewa na rewapanama ya kovina. <sup>4</sup> Vutuna aubainama deñoda tauda Arua Babau na ëgoane tè miana, be nam tubuña na ëgoane, inam rañganine tauda teneñinama da Mamaitua na tarawatumma tè voteyeteyena.

<sup>5</sup> Be taudi aitaūga tubuūga na ġoane ta miamiana, taudi adi noġotama matabuna tubuūga na ġoane e kenakenana. Be taudi aitaūga Arua Babau na ġoane ta miamiana, taudi adi noġotama matabuna Arua Babau na ġoane e kenakenana. <sup>6</sup> Deġoda tubuūga na ġoanama tà noġota guratena, damonama guri tà banavina. Be deġoda Arua Babau na ġoanama tà noġota guratena, damonama yawasana be suba tà banavidina. <sup>7</sup> Nama ta tubutubuġana, baninama tubuūga na wainua noġonoġotama inam Mamaitua na ġaviamo, be deġoda tauda tubuūga na wainua noġonoġotama tài muriwatanena, tauda tokare Mamaitua na tarawatuma nam tà voteyeteye. Be nam tokare tà voie be tenegina. <sup>8</sup> Taudi aitaūga tubuūga na ġoane ta miamiana, taudi nam Mamaitua timawai nuaverena.

<sup>9</sup> Be taumi nam tubuūga na waibadae koma miamiana. Ibewa! Deġoda Mamaitua Aruinama nopolie, naumeki da taumi Arua Babau na waibadae ko miana. Be deġoda aitau Keriso Aruinama nam tauna nopolie e mia, naumeki da tauna nam Keriso ġarona. <sup>10</sup> Be deġoda Keriso nopolie, tubuġimima ya gurina be Arua Babaue yawasana ko paġona, baninama Mamaitua ya kawa didimanima. <sup>11</sup> Mamaitua Aruinama Yesu gurie be ya kawa midisugħu munaġena. Deġoda inam Aruinama nopolie e miana, naumeki da tokare tauna vutuna, taumi tubuġimima guriguridima mate e kawa midisugħudina. Baninama tauna Aruinama nopolie e miamiana.

<sup>12</sup> Vutuna aubainama yau bana, tubuūga na ġoanama nam na noyama aba ġarode ima kenakenana. <sup>13</sup> Baninama deġoda taumi tubuūga na ġoanama koi muriwata nongoġena, taumi tokare ko gurina. Be deġoda Arua Babaue tubuūga na ġoanama gewgewedima koi guridina, taumi tokare yawasana ko banavina. <sup>14</sup> Baninama taudi aitaūga Mamaitua Aruinama ewai dokedina, taudi vutudi Mamaitua natunatunama.

<sup>15</sup> Be Mamaitua Arua Babau ya utemina inam nam e voiemi da taumi taunoya yababa da sibo ko nainaira. Ibewa! Be tauna Arua Babau ya utemina e voiemi da taumi Mamaitua natunatunama. Vutuna aubainama taumi yodi Mamaitua ġarone ko riuna, “Mamai”!<sup>d</sup> <sup>16</sup> Mamaitua Aruinama tauda aruidama e riuriuena da tauda riukaua Mamaitua natunatunama. <sup>17</sup> Yodi tauda Mamaitua natunatunama, vutuna aubainama tauda tokare Keriso mate Mamaitua na buderima tà paġona. Deġoda tauna na wainuatoitoi tauda mate tài nuatoitoi saguna, tokare Mamaitua neneġarine Keriso mate tà mia tenaġħana.

### Raġan muriġa na yawasanama

<sup>18</sup> Taugu yà kitakitana da wainuatoitoi yodi tà banabananividina taudi yawasana tokare e veraverauna ġarode e tavana, nam mate tài ruvaruva be teneteneġina, ibewa. <sup>19</sup>(-)

<sup>d</sup> 8.15 Aramaic bonane ‘Abba’ inam ‘Mamai’.

**20-21** Mamaitua yaba matabuna yawai tubuğidina ta guriguri be ta bovabova yababana, vutuna aubainama ma nuaboyedi ta miamiana. Be inam nam taudi adi ġoana, be tauwai tubuğidima na ġoane nama. Be yaġoro nopolimma ewai noġotana da raġanine Mamaitua na damma neneġarine ta saġana, taudi mate neneġara ta paġo da guri be bova adi raġanima e kovina. (v 19) Vutuna aubainama, yaba matabuna Mamaitua yawai tubuğidina, taudi tawai raba be keda ta kitakitana da uma yawasaninama saġasaġa vavasaġinama Mamaitua na sedama e utedina, dobue yaba matabuna matedie. **22** Tauda tè kataiena da pakane da yodi yaba matabuna ta yakeyakeina maika waivi raġanine ewai tikana tunimuyanama nama. **23** Be nam yabedima taudiga, be tauda mate, avedi da puyo Arua Babau tè paġona, be yaġoro tè yakeyakei be tħawwi rabana da Bada ei kawa natuneda be tubuğidama ei yawasanidina. **24** Raġanine Bada yai yawasanidana tauda tè noġonoġotina, da tokare tħawwi marae. Be tauda deġoda sibo kaite marae tħawwi, yodi nam tama noġonoġotina da sibo marae tħawwi. Baninama nam aitau yaba kaite ya paġo be yodi ima ġoegħoena e paġo munaġe. **25** Be yodi yaġoro mara nam te kitana, vutuna aubainama tauda nuatauġa tħawwi rabana da marae tħawwi.

**26** Be mate Arua Babau dà vogwaġġagħaġe e sagusagħudana. Baninama tauda nam moiragi kaua te kataiena, vutuna aubainama Arua Babau Mamaitua ġarone aubaidama moiragħie giu e vatovatodina, baninama tauda nam teneteneġina da tħawwi vatodi. **27** Arua Babau tauda aubaidama e moimoiragħina Mamaitua na ġoanama ruvane. Be aba Arua Babau Mamaitua e riuena, tauna kaite ya kataiena, baninama Mamaitua banaga babaudama nopolimma ya katai kauena. **28** Tauda tè kataie da banaga aitauġa Mamaitua tħawwi nuapaġoena, taudi ġarodie yawasana matabudi veredima, be piripiri ta tubutubuġħana inam vere taudi aubaidima. Uma banegħidima taudi vutudi Mamaitua bonimai ya vinedina na ġoanama ruvane. **29** Be banaga aitauġa Mamaitua ya vinevinedina, taudi ya voiedina maika natuġominama Yesu, be Yesu tauna tħawwi. **30** Be aitauġa Mamaitua ya vinevinedina, taudi ya yokoedina da sibo a verauna tauna ġarone. Be aitauġa tauna ya yokoyokoedina, taudi ya kawa didimanidina. Be aitauġa tauna ya kawakawa didimanidina, taudi yawasana verenama marae ya utedina.

### Mamaitua na wainuapaġoe nam aba tokare e dariġeda

**31** Yodi aba tħawwi? Deġoda Mamaitua tauda muride e midimidina, aitau tokare ei ġavieda? **32** Avedi da natuġominama be nam i rabe kwasena, be yaġoro yai utaena tauda matabuda aubaidama. Be tenegħine nama tauna na raukiviveree yaba matabudi e uteutedana.

**33-34** Vutuna aubainama nam aitau teneteneġina da ei wavuda, baninama Mamaitua kaite ya kawa didimanidina. Be mate Yesu Keriso

vutuna ya guri be ya midisuğu munağana, tauna Mamaitua kasaune e mia be aubaidama e moimoiragina.

<sup>35</sup> Be yodi Keriso na wainuapağoe nam aba tokare e dariğeda. Nam nuaboya, nam naira, nam raukivigewagewa, nam meiğara, nam waikaruwağawağā, nam iğara. <sup>36</sup> Girugiruminama porane ya girugirumina nama, “Tam kamtaie rağan matabuna tauma raukivigewagewa ka banabanavidina, be ta vunuvunuğimaina maika musara.”<sup>e</sup> <sup>37</sup> Be avedi da nuaboya tà banabanavidina, be yağoro tà vaisuba vavasağedina Yesu Kerisoe, tauna vutuna ewai nuapağoedana.

<sup>38</sup> Baninama taugu è katai kauena da Mamaitua na wainuapağoe nam aba tokare e dariğeda, nam guri, nam yawasana, nam anea, nam penama, nam yaba yodi ta tubutubuğana bo tokare ta tubuğana, nam aba rewapanidi, <sup>39</sup> nam arua gunume bo dobue, nam aba Mamaitua yawai tubuğidina, nam aba tokare Mamaitua na wainuapağoe e dariğeda, ibewa! Yesu Kerisoe Mamaitua yai kataidana da tauna ewai nuapağoedana.

### Mamaitua be Israel banegidima

**9** <sup>1</sup>Taugu Yesu Keriso matane yà riuriu kauana, be nam ama kaikaiyovuna. Arua Babau nopogue nama e riuriueguna. <sup>2-3</sup> Israel banegidima nam adi waisumağā, vutuna aubainama taugu nopogue èi nuaboya da èi nuaboya kauana, be è noğoti da Mamaitua taugu sibo ya raukivi gewegewegu be taudi sibo yai yawanadina. <sup>4</sup> Baninama taudi Mamaitua ya vinedina da tauna natunatunama be taudi neneğarinama a kita be na saugama ğarodie ya boruna. Taudi Mousis na tarawatuma a pağō be tempol nopone ta tapataparorona, be Mamaitua ya riuedina da tokare ei yawanadina. <sup>5</sup> Be taudi ğarodie dede pakanama banegidima,<sup>f</sup> be inam damne Yesu Keriso ya tubuğana, tauna vutuna Mamaitua, be rağan matabuna ta kaikai suğu nonoğena! Inam riukaua.

### Aitaüğa Mamaitua na damma nopone?

<sup>6</sup>Taugu yà riuriuna da Mamaitua na saugama nam i kavena. Israel banegidima nam matabudi Mamaitua na dam. <sup>7</sup>Avedi da taudi Eibrahim natunatunama, yağoro nam matabudi Mamaitua na seda, ibewa. Mamaitua Eibrahim umanama ya riuen, “Aisik na dame taugu tokare am sedama è sausagemna yà utemna.” <sup>8</sup>Inam baninama umanama: Avedi da taudi Eibrahim natunatuğominama, yağoro taudi nam Mamaitua natunatuna, be aitaüğa Mamaitua na saugama tauwai sumağenama, taudi inam riukaua Mamaitua natunatunama. <sup>9</sup>Mamaitua

<sup>e</sup> 8.36 Gurik bonane ya riuna ‘sipu’, be nam ‘musara’. <sup>f</sup> 9.5 Dede pakanama banegidima inam: Eibrahim, Aisik be Jeikob.

na saugama Eibraham ġarone inam umanama ya riuna, “Taugu yau raġanima è boruborue taugu yà yovo munaġana, yodibe Sera gomana taugōminama tokare e tikana.”

<sup>10</sup> Be teneġinama nama Rebeka ġarone. Rebeka na sedama tautauġomidima tamedima tenaġa Aisik, tauda mate tamadama.  
<sup>11-12</sup> Be Rebeka muriġa da seda raġaraġa e tikidi da yawasana veredi bo gewegewedima ta voiedina, be noġone Mamaitua Rebeka umanama ya riuena: “Gomana tautuġa tokare tasinama ġarone ei taunoyana.” Mamaitua nama ya riuna, inam tauda sibo tè kataie da Mamaitua na ġoane banaga e vinevinedina, be nam adi noyama debane. <sup>13</sup> Vutuna aubainama girugiruminama porane umanama ya riuna, “Jeikob nuaguma e paġopaġona be Iso è tuaġaiena.”

<sup>14</sup> Be yodi nema tà riu bako? Mamaitua nam didimana banegina, bo?  
<sup>15</sup> Mamaitua Mousis umanama ya riuena,

“Taugu yau raunuatoima banaga yà ġoeġoena nama yà raunuatoiena,  
 be yau raukiviverema banaga yà ġoeġoena nama ġarone yà  
 raukivi verena.”

<sup>16</sup> Vutuna aubainama banaga yawasana ta paġona, be nam adi ġoane bo adi noyama veredima aubaidi, ibewa, be Mamaitua taunaġa e ġoeġoena nama e raukivi verena ġarodie.

<sup>17</sup> Be guyau Pero ġarone ko kita. Mamaitua tauna ġarone ya riuna umanama, “Taugu è voiem da guyau kuya tubuġana, inam taugu yau rewapanama ġarome yai maġatari da dobu matabuna ta kita be isaguma ta kaisuġuna.” <sup>18</sup> Vutuna aubainama Mamaitua na raukiviverema banaga e ġoeġoena, nama ġarone e raukiviverena. Be mate Mamaitua e ġoeġoena nama, banaga noponama e kawa badona.

<sup>19</sup> Be tokare banaga ġesaumima umanama ko riueguna, “Deġoda Mamaitua na yawasanama nama, aba aubainama tauna e riuriuna da tauma gewagewa banagimai? Tauda nam teneteneġina da na ġoanama tai ġake.”

<sup>20</sup> Tam am rewapanama aba da Mamaitua e giugiu be kwa riuite munaġe? “Gurewa nam tokare aitau tauvoienama e riuena: Abi aubainama umanama kitaguma kuya voiegħu?” <sup>21</sup> Gurewa tauvoienama doġa teneġinama e paġo be na ġoane nama gurewa verenama be kamai guregurewa e voivoiedina. <sup>22</sup> Be inam kauinama teneġinama nama. Mamaitua guyau Pero be Ijipt banegidima ya vinedi da ġarodie na medima be na rewapanama ei maġatarina. Be avedi da Mamaitua ya vinedina da taudi sibo a gurina, be tauna yaġoro mareġa ewai rauriedina. <sup>23</sup> Be banaga ġesaudima ya vinedina da taudi neneġarinama maumaurinama tokare a paġona. Vutuna aubainama Mamaitua na raukiviverema be na rewapanama taudi ġarodie yai maġatarina. <sup>24</sup> Be inam banegidima inam tauda, tauna Jius be eteni nopodie ya vinedana.

<sup>25</sup> Maika Mamaitua peroveta Osea ya riuriuena nama,  
 “Taugu tokare eteni banegidima yà vinedi  
 be yà voiedi da taudi yau banagama.  
 Be taudi nuaguma ta paǵona,  
 avedi da yodi nuaguma nam tima paǵopaǵona.”

<sup>26</sup> Be mate Osea ya riuena,  
 “Deǵo è ruedina, ‘Taumi nam taugu yau banaga’,  
 yodi tokare yà ruedina, ‘Taumi Mamaitua miamia nonoǵinama  
 natunatunama.’”

<sup>27</sup> Be peroveta Aisaia Israel aubaina ya riuna umanama,  
 “Avedi da Israel banegidima sievidima maika gimori gerese,  
 be raubisaǵa tokare ei yawasanidina.

<sup>28</sup> Baninama Mamaitua na ogama ya tarataraǵina nama,  
 tokare e voia makaie be e voia rovona.”

<sup>29</sup> Inam maika Aisaia kaite ya vatona,  
 “Deǵoda Bada wairewapana vavasaǵinama banaga raubisaǵa sibo  
 nam i gosedi,  
 tauda tokare Sodom be Gomora banegidima tè ruvedi be tè guri  
 rovona.”<sup>g</sup>

### Israel banegidima nam waisumaǵa ǵarodie

<sup>30</sup> Be yodi tà kita da eteni banegidima avedi da didimana nam  
 ti wanewanena, be yaǵoro Mamaitua adi waisumaǵe ya kawa  
 didimanidina. <sup>31</sup> Be Israel banegidima taudi didimana nam ti banavina,  
 baninama taudi didimana tarawatue a wanewanena aubainama. <sup>32</sup> Aba  
 aubainama didimana nam ti banavi? Baninama taudi a noǵoti da adi  
 noyama veredie kabe didimana ta banavi, be nam waisumaǵe. Taudi  
 yeku<sup>h</sup> adi kaba saǵaivitarema a saǵai vitarena. <sup>33</sup> Ya girugirumina nama:

“Ko kitana, taugu Saionma yeku yà boruboruna,  
 be vutuna banaga e voiedi da ta saǵai vitare be ta bekuna.  
 Be aitau uma yekunama ewai sumaǵena,  
 tauna tokare nam tunimayaǵe e mia.”

**10** <sup>1</sup> Yau bana, taugu nuaguma e ǵoǵoe kae be Mamaitua yàwai  
 baǵana da tauna sibo Israel banegidima yai yawasanidina.  
<sup>2</sup> Taugu è kataiena da taudi ta raraubu guratana da Mamaitua sibo  
 a tainuaverena, be tauna anitai nuaverenama na kedama, nam ti katai  
 kauen. <sup>3</sup> Taudi Mamaitua na didimana kedanama a riutuaǵaie, be taudi  
 adi noǵotama nama na ruvae didimana kedanama a wanewanena. <sup>4</sup> Be  
 taudi nam ti kataiena da Keriso ya voie da tarawatu na raǵanima ya

<sup>g</sup> 9.29 Sodom be Gomora adi gututuma ko sievidina. (Genesis 19:1-29) <sup>h</sup> 9.32 ‘Yeku’ inam  
 Yesu Keriso.

kovina. Be aitau da Keriso ewai sumaġena, tauna tokare didimana e banavina.

<sup>5</sup>Mousis didimana tarawatue umanama ya giuedina, “Aitaūga uma kaudima yà giugiedina e voiedina, tauna tokare ġarodie yawasana e banavina.” <sup>6</sup>Be didimana waisumaġe inam umanama ya giuedina, “Nam nopomie ko riuna, ‘Aitau e saġa e naġo marae be Keriso e yovoġe?’” <sup>7</sup>Bo “Aitau e yovo e naġo guriguridima adi gabue be Keriso e saġe?” Ibewa! <sup>8</sup>Inam kaudie nam tokare yawasana ko banavidi. Be you, didimana waisumaġe umanama ya giuedina, “Yawasana riunama inam ġaromie; mudumie be nopomie.” Inam riunama vutuna waisumaġa riunama tauma ka rarauguguya.

<sup>9</sup>Inam giudima banidima umanama, Deġoda tam mudume kwa riuna, “Yesu tauna Bada” be nopome kwai sumaġa da Mamaitua Keriso gurie be ya kawa midisuġu munaġena, tam tokare yawasana kenakena nonoġinama kwa banavina. <sup>10</sup>Baninama dà waisumaġe tokare Mamaitua e kawa didimanidana, be deġoda mudude Yesu Keriso tà giuena, tauda tokare Mamaitua ei yawasanidana. <sup>11</sup>Vutuna aubainama girugiruminama umanama ya riuna, “Aitau tauna ġarone ewai sumaġana, tauna tokare nam tunimayaġe e mia.” <sup>12</sup>Yodi uma giunama mayanama maika banaga matabuda, tauda Jius be eteni banegidima matabuda e riuriuedana, baninama Bada tauna tenaġa, be banaga matabuna ewai badedina, be vere dosidima aitaūga tauna ġarone sagu tawai baġena e uteutedina, <sup>13</sup>baninama girugiruminama nama ya riuna, “Aitaūga Bada ġarone yawasana tawai baġena, taudi tokare ei yawasanidina.”

<sup>14</sup>Be nema taudi sagu tai baġe bake, deġoda taudi Bada nam tai sumaġe? Be nema Bada tai sumaġa bake, deġoda varinama nam ta vaie? Be nema vari verenama ta vaia bake, deġoda nam aitau ġarodie e rauguguya? <sup>15</sup>Be nema taudi ta rauguguya bako, deġoda Keriso taurauguguya nam e riuporāġa? Girugiruminama umanama ya riuna: “Banaga tawai nuavere kauana raġanine taurauguguya ta verau be vari verena be suba giunama ta rarauguguya.”

<sup>16</sup>Be nam Israel banegidima matabudi vari verenama ti paġona. Inam maika peroveta Aisaia ya riuriuna nama: “Bada, nam banaga toitoi ama giuma ti sumaġena.” <sup>17</sup>Be yaġoro Keriso banaga ya riuporedina rauguguya aubainama be adi rauguguya banaga ta vaie, be tai sumaġana.

<sup>18</sup>Be Jius banegidima nemanama? Taudi vari verenama nam ti vaie, bo? Ibewa da taudi kaite a vaiena. Baninama girugiruminama porane ya riuna umanama:

“Taudi a rarauguguya varinama dobu matabuna yai moġavuna, be dobu damodie mate.”

<sup>19</sup>Bo agunai Jius banegidima a vaiena be baninama nam ti kataue, bo? Ibewa, taudi a kataiena. Uma kauinama vutuna aubainama Mamaitua Mousis umanama ya riuenas:

“Avedi da eteni banegidima buebuedima taudi nam Jius, be tokare  
yà vinedina.

Yodibe taumi tokare ko unuredi be ko mediedina.”

**20** Be Aisaia mate umanama ya riuna:

“Aitauga taudi nam ti wanewaneguna,  
taudi ̄garodie è māgatara be a banaviguna.”

**21** Be Israel banegidima aubaidima umanama ya riuna:

“Rāgan daudaunama taugu aubaimima èwai rabana da sibo ̄garogue  
koya tavana,  
be taumi nam ko tavana, baninama taumi banaga beapotepotemi  
be raraukosogāgaimima.”

### Israel banegidima tautaugosedima

**11** <sup>1</sup>Be yodi nemanama? Mamaitua na banagama ya tuāgaiedi, bo?  
Ibewa! Taugu mate Israel banegiguma, Eibraham natunama, be  
Bendiman na damma nopone.

<sup>2</sup>Mamaitua na banagama boni ya vinevinedina nam i tuāgaiedina,  
ibewa! Elaija na gututuma ko nōgoti, rāganine tauna Mamaitua ̄garone  
ya riubona badobadona Israel banegidima kadi taiye. <sup>3</sup>Tauna umanama  
ya riuna: “Bada, taudi am perovetama matabudi ai guri rovodi be am  
oltama a katiweidina. Be yodi taugūga yà miamiana, be taudi ta ̄goēgoe  
da taugu mate tai gurigunguna.”

<sup>4</sup>Be Bada umanama ya paribeena: “Taugu banaga 7 tausand  
aubraiguma è taugosāgana, baninama taudi nam kokoitau Bal ̄garone ti  
raudunena.”

<sup>5</sup>Be yodi uma rāganine kauinama tenēginama nama. Mamaitua na  
raukiviveree banaga tautaugosedima ya vinedina. <sup>6</sup>Tauna na raukiviveree  
ya vinedina be nam adi noyama debane. Be dēgoda adi noyama debane i  
vinedina, agunai raukivivere nam baniboruboruna.

<sup>7</sup>Be yodi tà kita, Israel taudi didimana a wanewane guratena be nam  
ti banavina. Be Mamaitua na vinevinema banegidima taudīga didimana  
a banavina, be Israel banegidima ̄gesaudima Mamaitua ya kawa  
nopobadodina <sup>8</sup>maika girugirumina porane ya riuriuna nama:

“Mamaitua arua gewagewanama ya utedi,  
be uma aruinama taudi ya kawa debabuedi  
be ya voiedi da matedie nam timawai kita  
be beedie nam timawai beavaiana naumeki da yodi.”

<sup>9</sup>Be Deivid umanama ya riuna:

“Taudi adi puyoma soidima sibo ya tikona munāgedi,  
be a sāgai vitaredina, baninama inam adi kovōgama.”

<sup>10</sup>Taudi sibo arue matedima ai kupikupi da taudi nam sibo ai kita,  
be rāgan matabuna sibo ̄gaya a kwarina.”

### Eteni banegimima taumi nam ko rauguyaguyau

<sup>11</sup> Yodi yài taravira munağemina. Mamaitua na banagama ya tuağai vavasağedi, bo? Ibewa! Israel banegidima Mamaitua a mia tautauriena, aubainama Mamaitua eteni banegidima ei yawasanidina da Israel banegidima sibo a unurana eteni banegidima ġarodie. <sup>12</sup> Be uma ko noğoti, Israel banegidima taudi Yesu Keriso a tuağaiena, aubainama eteni banegidima dobu matabuna yawasana a banavina, Israel banegidima matabudi Yesu tawai sumağena rağanine, eteni banegidima tokare waiaiaina dosinama ta pağona.

<sup>13</sup> Be taumi aitauğā nam Jius, taumi yodi yà riuemina: Taugu ei nuaverena da Mamaitua ya riuporeguna taumi eteni banegimima ġaromie da vari verenama yà rauguguyena. <sup>14</sup> Be uma kauine Jius banegidima nuedima ei medi be taudi mate tai sumağana. <sup>15</sup> Be yodi ko kita da, rağanine Mamaitua Jius banegidima ya riuriu tuağaiedina, inam rağanine dobu matabuna adi gewagewama ya noğota poredina, be rağanine Mamaitua Jius banegidima ei anina munağedina, aba tokare e tubuğā? Inam rağanine banaga guriguridima ta midisuğu munağana. <sup>16</sup> Baninama değoda Mamaitua Jius adi dedema pakanama banegidima yai aninedina, naumeki da taudi adi sedama mate Mamaitua tokare ei aninedina. Inam kauinama teneğinama maika kai olip. Değoda kai olip waraminama yai aninena, naumeki da kai ragedima mate tokare ei aninedina.

<sup>17</sup> Be yodi rağandie Mamaitua uma kainama ragedima ġesaudima ya kotovidina, be taumi avedi da dobira olipnama, be ya ragaumi da olip ragedima ya kotokotovidina kividie ya pani wairatumina. Be yodi taumi olip waraminama bodinama na rewapanae taumi ko gogogogona. <sup>18</sup> Vutuna aubainama olip ragedima midimididima noğodie nam ko seğara! Be ko noğoti da warama nam na yasima taumi. Taumi ami yasima inam warama.

<sup>19</sup> Be agunai taumi umanama ko riuna, “Mamaitua kai olip ragedima ġesaudima ya kotovidina, kividie tauma e pani wairatumaina aubainama.” <sup>20</sup> Inam riukaua, be ko noğoti da taudi nam tiwai sumağana aubainama Mamaitua ya kotovidina, be taumi Keriso kowai sumağena aubainama Mamaitua taumi ya pani wairatumina. Vutuna aubainama nam noğodie ko seğara, avedi! Be taumi sibo koya nairana, <sup>21</sup> baninama değoda Mamaitua kai ragedima veredima i kotovidina, taumi mate tokare ya kotovimina, değoda taumi nam koi sumağana.

<sup>22</sup> Be yodi tauda Mamaitua na raukiviverema be na raukivigewagewama tà kitana. Tauna na raukivigewagewama taudi aitauğā nam Mamaitua tima vovo teyetyena ġarodie, be değoda rağan matabuna koi sumağena, na raukiviverema taumi ġaromie e kenana,

be deḡoda ibewa, taumi mate e kotova poremina. <sup>23</sup>Be deḡoda Jius banegidima waisumaḡa tai kare munaḡena, taudi tokare Mamaitua e pani wairatu munaḡedina, baninama na rewapanama e kenakenana da nama e voiana.

<sup>24</sup>Be avedi da taumi dobira olipnama, be yaḡoro Mamaitua ya paḡomi da olip verenama bogane ya pani wairatumina. Vutuna aubainama tauna tokare teneteneḡinama da olip verenama ragedima ya kotokotova poredina, kividie e pani wairatu munaḡedina.

### Mamaitua tokare Israel banegidima ei yawasanidina

<sup>25</sup>Yau bana, uma inam riukaua semosemonama yà riuriuemina da taumi ko kataie be nam ko kawa saḡe munaḡemi Israel banegidima noḡodie. Inam riukaua da Mamaitua Jius banegidima ġesaudima ya kawa nopoladodi da nam ti sumaḡana. Inam kauinama nama Mamaitua ya voie da eteni banegidima sievinama ya noḡonoḡotina paratine nama ei yawasanidina, <sup>26</sup>yodibe Israel banegidima mate ei yawasanidina maika girugiruminama poranama ya riuriuna nama:

“Tauwai yawasana Jerusalemḡa e verau  
be e voie da Jeikob na damma Mamaitua tai nuapaḡo munaḡena.

<sup>27</sup>Be taugu waianina yà uteutedina raḡanine,  
adi gewagewama yà noḡota poredina.”

<sup>28</sup>Yodi taudi vari verenama a tuaḡaiena, vutuna aubainama taumi eteni banegimima yawasana ko paḡona, be Jius taudi Mamaitua na ḡaviam. Baninama Mamaitua Jius adi dedema pakanama banegidima ya vinedina, taudi kadi taiye Jius banegidima yaḡoro tauna na banagama, <sup>29</sup>baninama Mamaitua na giu be na puyoma nam airaḡan nuanama e vitaredi be e kaiporaḡa munaḡedi. <sup>30</sup>Taumi noḡone eteni banegimima, taumi Mamaitua koya rawarawa ḡaiḡaiena. Be yodi taumi Mamaitua na raunuatoima koya paḡona, baninama Jius banegidima Mamaitua a rawaḡaiḡaiena aubainama. <sup>31</sup>Be tokare taudi mate Mamaitua na raunuatoima ta paḡona, avedi da taudi yodi ta rawarawa ḡaiḡaiena, baninama Mamaitua na raunuatoima taumi ḡaromie aubainama. <sup>32</sup>Be yodi tà kita da banaga matabuna adi rawaḡaiḡae Mamaitua ya panidina, inam kedane tokare matabudi Mamaitua na raunuatoima ta paḡona.

### Pol Mamaitua e kaikai suḡusuḡuna

<sup>33</sup>O kapore! Aba kam Mamaituama tam kuya vere ḡaḡa kè banavim. Am nuauyayama be am kataima ya saḡa vavasaḡa be ya yovo guratana. Tauda nam teneteneḡina da Mamaitua na yawasana be na kovogħama tà kataiedi. <sup>34</sup>“Aitau Mamaitua na noḡotama ya kataie? Be aitau teneteneḡina da Mamaitua e raukure?” <sup>35</sup>Bo “Aitau aba Mamaitua ya ute da yodi Mamaitua tauna ei maesi munaḡe?” <sup>36</sup>Yaba matabuna taune

da ta tubutubuğana, be tauna na rewapanae ta kenakenana. Tauna tà kaisuğusuğu nonoğena. Inam riukaua!

### Dà yawasanama sibo Mamaitua tè utena

**12** <sup>1</sup>Yau bana, yodi Mamaitua na raunuatoie yà riuriu vavasağemina da tubugimima Mamaitua ko utena. Be rağanine tubugimima Mamaitua ko uteutena, inam vutuna puyo babau yawayawasaninama. Dabudine Mamaitua ei nuaverena, baninama uma kauinama inam riukaua taparoronama, Arua Babau nama e ġoegoena. <sup>2</sup>Be nam dobu banegidima adi vaivae ko mia, avedi! Be Mamaitua koi bağda da ami noğotama e vitaredi be taumi ami yawasanama e rawavaudina. Yodibe taumi tokare teneteneğinama da Mamaitua na ġoana be na verema ko kataiedina. Be Mamaitua na ġoanama inam ya vere vavasağana.

<sup>3</sup>Taugu Mamaitua na apasolma, vutuna aubainama yà riuriu vavasağemina: Nam ko noğota munağemi da taumi koya sağga guratana, ibewa da Mamaitua taumi tenatenağaga ami waisumağama ya uteutemina, na ruvae nama ko noğota munağemina. <sup>4</sup>Tauda tubuğidama tenağga be ragaragadama toitoi, be raga tenağga adi noyama tabu be tabu. <sup>5</sup>Be uma kauinama teneğine tauda toitoi be tubuğga tenağga Yesu Kerisoe, be taune tauda matabuda tèi rawa teğeidana.

<sup>6</sup>Be matabuda dà noyama tabu be tabu, Bada puyo tabu be tabu ya uteutedana na ruvae nama. Aitauğga da tauwai peroveta, naumeki da tai perovetana adi waisumağama ruvane. <sup>7</sup>Aitauğga da tauwai sagu, naumeki da tai saguna, be aitauğga da tauwai katakatai, naumeki da tai katakataina, <sup>8</sup>be aitauğga da taurauduğu, naumeki da ta rauduğuna, be aitauğga da taupaipairu, naumeki da riukaue ta pairuna, be aitauğga da tauwai bada, naumeki da nuedima tabutabune tai kedadoka kauana. Be aitauğga da taurau nuatoi, naumeki da ma nuaveredi banaga ta sagudina.

### Kuristen na yawasanama

<sup>9</sup>Ami wainuapağoma ami banagama ġarodie nam kaiyovue. Yaba gewegewedima ko tuağaiyedi be yaba veredima ko kaidididina. <sup>10</sup>Nuemima tabutabune ami banagama mate koi nuapağó be koi kawa vivira munağga! <sup>11</sup>Be nam airağan matemima e gayawa, be rağan matabuna nuemima tabutabune Bada aubainama ko noya!

<sup>12</sup>Ko noğoti da rağan tenağga taumi tokare ko nağona marae, vutuna aubainama koi nuavere! Be piripiri rağandie ko vataradidi be ko moiragi nonoğga! <sup>13</sup>Mamaitua na banagama waikaruwağewağedima ko sagudi! Be değoda vağavağai be ya tavana, ko rabe kauena!

<sup>14</sup>Aitauğga da ta raraukivi gewegewemina, naumeki da taudi aubaidima ko moiragi be Bada ei aiainidi! Taumi banaga koi aiainidina be nam koi taratautauedi! <sup>15</sup>Değoda aitauğga tawai nuaverena, naumeki da taumi

mate koi nuaverena, be deḡoda aitaūga ta ḡabaḡabana, naumeki da taumi taudi mate ko ḡabana. <sup>16</sup>Taumi subae ko mia be nam ko rauguyaguyau, be nam ko kawa saḡe munaḡemi! Kamai banabanaga mate koi turaturanana. Be nam ko noḡoti da taumi banaga katakataim!

<sup>17</sup>Gewagewa nam gewagewae koi maesi. Be ko kita kaua da banaga matabudi matedie taumi didimanae ko miana. <sup>18</sup>Ko raurubu da banaga matabudi mate subae ko miana. <sup>19</sup>Yau bana, nam biwa ko paḡo, be ko gose da Mamaitua taunaḡa e raubiwana, baninama girugiruminama poranama ya riuna umanama,

“Bada ya riuna, ‘Taugu taurau biwa be taugu tokare ami biwama yà paḡona’.

<sup>20</sup>Deḡoda am ḡaviamma kani e karatina, naumeki da kani kwa utena be deḡoda nuanama e raukasakasana, naumeki da upa kwa ute!

Deḡoda am ḡaviamma ḡarone nama kwa voiana, debane upa kwa ḡini pore be tauna e tunimayaḡana.”

<sup>21</sup>Gewagewa nam tam e vaisubam, be tam veree gewagewa kwa vaisubana!

### Gabeman ko voteyeteyedi

**13** <sup>1</sup>Banaga matabuna sibo gabeman a voteyeteyena, baninama gabeman matabudi adi rewapanama inam Mamaitua ya utedina.

<sup>2</sup>Vutuna aubainama aitau gabeman ḡarodie e paripari viravirana, tauna Mamaitua ḡarone mate e paripari viravirana, tauna tokare kovoḡa e banavina. <sup>3</sup>Tam deḡoda vere kwa voivoiena, inam raḡanine tam tokare nam pirisiman kwa nairedina. Be deḡoda gewagewa kwa voiena, inam raḡanine tam tokare pirisiman kwa nairedina. Vutuna aubainama tam deḡoda naira kwa tuaḡaiena, naumeki da vere kwa voie be taudi tokare tam isamma ta kawa saḡena. <sup>4</sup>Baninama Mamaitua gabeman ya riuporedina da taudi tam ta sagumna aubainama, be deḡoda tam gewagewa kwa voiena, inam raḡanine taudi kwa nairedina, baninama Mamaitua rewapanama ya utedina da taudi tam tokare ta kovoḡimna. <sup>5</sup>Vutuna aubainama gabeman aba ta riuriuena, naumeki da kwa voiena, inam raḡanine am noḡotama tokare verenama e kenana. Be mate tam tokare nam kovoḡa kwa banavi.

<sup>6</sup>Raḡan matabuna gabeman ta noyanoyana Mamaitua aubainama, vutuna aubainama taumi teks koi maesidina. <sup>7</sup>Nama banaga matabudi adi kauama ko utedina. Deḡoda teks sibo koyai maesidina, naumeki da koi maesina, be aitaūga sibo koya voteyeteyedina, naumeki da ko voteyeteyedina, be aitaūga sibo koya viviredina, naumeki da ko viviredina.

### Wainuapaḡo na riuvavasaḡama

<sup>8</sup>Nam aitau na maesama ko rabe kwase. Be raḡan matabuna umanama koi nuapaḡo vivirana. Baninama deḡoda banaga ḡesaudima koi

nuapañoedina, inam vutuna taumi tarawatu ko vovo teyeteyena. <sup>9-10</sup> Be inam rağanine tokare nam aba gewagewanama taudi ġarodie ko voie. Maika riuvavasağā e riuriuna nama, “Nam turamma debane mui kwa pore, be nam kwa rauvunuğā, nam na purapurama kwa danenedi, nam kwai kwina”. Be riu vavasağā ġesaudima mate, matabudi a rawateğeidina giu tenağā nopone, be giunama inam umanama: “Turamma turamma nuamma e pağona, maika tamğā kwawai nuapağō munağemna nama” Vutuna aubainama değoda banaga ġesaudima ġarodie koi nuapağona, inam vutuna taumi tarawatu ko vovo teyeteyena.

### **Yanae ko miana**

<sup>11</sup> Naumeki da nama ko voiana, be yodi rağandima kitedima ko katai kauedina. Baninama Bada na rağanima kaiteka e tavatavana, nam maika boni rağandie tauda waisumağā tèwai karee nama. Vutuna aubainama matemima e kaya. <sup>12</sup> Kupi ġaubonağā e kovina, be rağan kaiteka e tomtomna. Vutuna aubainama kupi na voiama tà gosedi, be yana na madama tà ragaudina. <sup>13</sup> Tauda matabuda didimanae tà miana, maika banaga suare e miamiana nama. Tauda nam kaua gewegewedima soidima tà voiedi, nam tà tego bua, nam tài soğā yababayababa, nam tà iğara yababayababa, bo tà unura. <sup>14</sup> Inam yabedima avedi, be Yesu Keriso na ġoane nama ko miana. Be nam gewagewa ko wanewanedi da tubuğimima na ġoanama kededima gewegewedima ko voiedi, avedi!

### **Banaga adi waisumağama gwağegwağedi be wairewapanidima**

**14** <sup>1</sup>Aitauğā da ami waisumağama wairewapanidima taumi ami banagama ġesaudima adi waisumağama vogwağegwağedima sibo koya kaisagudina. Be nam adi wainua noğonogötama debedie koi kawa riuriu! <sup>2</sup>Banaga aitauğā adi waisumağama wairewapanidima, taudi nam ai kani tima widiwidinena, ibewa da taudi kani matabuna ta kanikani yababayabedina. Be banaga ġesaudima aitauğā adi waisumağama vogwağegwağedima, taudi nam musara tima kanikanina.<sup>i</sup> <sup>3</sup>Vutuna aubainama aitau da kani kanikani yababayabinama, tauna banaga musara tautuağaienama, nam sibo ya kita tuağāie. Be aitau da nam musara taukanina, tauna banaga kanikani yababayabinama nam sibo ya etare, baninama taudi adi waisumağama ruvane Bada yai aninedina. <sup>4</sup>Tam aitau da Bada na taunoyama kwa etaredi? Tam nam dobudi am

<sup>i</sup> **14.2** Banaga aitau adi waisumağama vogwağegwağedima, taudi nam musara ti kanikanina, baninama taudi nam ti katai kauena değoda inam musara veredi bo boita a puyopuyodina museridi. Be aitauğā adi waisumağama wairewapanidima, taudi musara a kanikani yababayabedina. Be uma kauinama teneğinama vers 5 nopone, dabudine nam musara be rağan vinevinedima.

noyama aba ima kenakenana. Taudi Bada na taunoyama aubainama taunağā ya kataiedina, da taudi a beku bo ibewa. Be taudi tokare nam ta beku, baninama taudi Bada na rewapanae ta midimidina.

<sup>5</sup>Banaga adi waisumağama gwağegwağedima taudi rağan dosidima vinevinedima ta viviviviredina. Be banaga ġesaudima ta noğonoğotina da rağan dosidi be rağan ġoma matabudi teneteneğidima. Be banaga tenatenağā nuane ei nuanoğonoğota da değō tauna ġarone ya vere.

<sup>6</sup>Aitau da rağan dosidima vinevinedima e viviviviredina, naumeki da tauna nama e voiena, Bada isanama anikaisuğunama aubainama. Be aitau nam kani matabudi ima kanikanidina, bo aitau da kani matabudi e kanikanidina, naumeki da matabudi nama ta voiana Bada isanama anikaisuğunama aubainama, baninama noğone taudi ta moiragi be ta kanikanina aubainama. <sup>7</sup>Tauda nam aitau mabide tama miamia bo mabide tama gurigurina, <sup>8</sup>ibewa da tauda tà miamia bo tà gurigurina, inam matabuna Bada aubainama, baninama tauda inam tauna ġaroğaronama. <sup>9</sup>Vutuna aubainama Keriso ya guri be ya midisuğū munağana, da banaga yawayawasanidi be guriguridima, matabudi ewai badedina.

<sup>10</sup>Be yodi tam aba aubainama turamma kwa etare? Bo aba aubainama turamma kwa kitakita tuağiae? Tauda matabuda tokare Mamaitua noğone tà midi, be taunağā tauda tenatenağā e etaredana, <sup>11</sup>maika girugiruminama porane Mamaitua ya riuriuna nama:

“Taugu Mamaitua miamia nonoġigma, be yà riuriu kauemina  
da tokare banaga matabudi kağapakague tuapikedima tai  
tutumidiridi da ta rauduneegu  
be matabudi mududie tai mağatarigu be ta riuna: ‘Tam riukaua  
Mamaitua.’”

<sup>12</sup>Be yodi tà kita da tauda tenatenağā tokare dà kauama matabudi Mamaitua noğone tai mağataridina. <sup>13</sup>Vutuna aubainama nam turamma turamma kwa etare, avedi! Be kwa kita da nam anibeku kauidie turamma kwa voie da na waisumağe e beku.

<sup>14</sup>Bada Yesu ya riuegu be è katai kauena da nam aba kaninama Mamaitua matane i miramirana. Be değoda aitau e noğoti da aba kaninama ya miramirana, naumeki da tauna ġarone uma kaninama ya miramira kauana. <sup>15</sup>Be değoda am kani yababayababama aubainama turamma kwai nuaboyana, inam kauine tam nam turamma kumawai nuapağona. Nam am kani yababayababama aubainama turamma kwa voie da na waisumağe e beku. Baninama Yesu ya gurina tauna mate aubainama. <sup>16</sup>Be rağanine am ġoanama nama uma yabedima kwa voivoiedina, kwa kita da am banagama nam tai giuguem.

<sup>17</sup>Mamaitua na waiguyaue kani be tego inam nam baniboruboruna. Ibewa da didimana, suba be mosari Arua Babaue, inam vutudi yaba

dosidima.<sup>18</sup> Be deḡoda uma kauidie Keriso ġarone koi taunoyana, inam vutuna Mamaitua ewai aninemina, be banaga ta viviremina.<sup>19</sup> Tauda vutuna aubainama tà raurubu gurata da suba yabedima tà voiedi be yaba gesaudima mate tà voiedi da, dà waisumaġama tài rewapanana.

<sup>20</sup> Nam kani kadi taiye Mamaitua na noyama ko kawa gewegewedi! Kani matabudi inam veredima be deḡoda yaba tenaġa kuya kanikani be turamma kuya voie da na waisumaġe ya bekuna, inam tam gewagewa kuya voiena.<sup>21</sup> Vutuna aubainama deḡoda tam musara kuya kanikani bo bia<sup>j</sup> kuya tegotego, bo aiyaba gesaudima kuya voivoiedi, be inam yabedie turamma na waisumaġama vogwaġagwaġanama kuya voie da ya bekuna, ya verena da uma kauidima nam kwa voiedi.<sup>22</sup> Deḡoda uma kauidie am waisumaġama ewai rewapanana kauana, naumeki da tam be Mamaitua taumiġa ġaromie e kena kwasana. Ya verena da uma kauidie tam nam kwa noġota bekubeku, baninama tam kuya kataiena da uma kauidima matabudi inam naumeki.<sup>23</sup> Be tam deḡoda uma kauidie kwa noġota bekubekuna, tokare Mamaitua etaremna, baninama tam nam waisumaġe uma yabedima kuma kanikanidina. Yaba matabuna nam waisumaġe kwa voiedi, inam taudi gewagewa.

**15** <sup>1</sup>Tauda aitaūga dà waisumaġama wairewapaninama, naumeki da aitaūga adi waisumaġama gwaġegwaġedima sibo tè sagudina, be nam taudaġa tà sagusagu munaġeda. <sup>2</sup>Be tauda tenatenaġaġa sibo dà banagama tè sagudi da adi waisumaġe sibo ai rewapanana. <sup>3</sup>Baninama Keriso nam taunaġa i sagu munaġena, ibewa da girugiruminama porane umanama ya riuna: “Banaga tam a kunuremna be inam kunurinama taugu mate a kunureguna.” <sup>4</sup>Riuwai noġota matabudi boni a girugirumidina, inam taudi waikatakataidama aubainama, da e duġuda be waisumaġe tài rewapanana da tokare tà naġona marae.

<sup>5</sup>Mamaitua, vutuna e duġuduġumi be e sagusagumina da ami waisumaġe piripiri matabudi ko dami poredina, tauna ya voiemi da taumi nuemima tenaġa Keriso koi muriwatanena. <sup>6</sup>Yodibe taumi tokare teneteneġinama da Mamaitua isanama ko kaisuġusuġu tenaġena. Vutuna tauna dà Badama Yesu Keriso Tamanama.

<sup>7</sup>Taumi ami banabanagama koi aninedina, maika Keriso taumi yai aninemina. Uma kauine nama taumi tokare Mamaitua isanama ko kaikai suġusuġuna. <sup>8</sup>Ko noġoti da Yesu Keriso ya yovo be ewai maġatarana da Mamaitua na saugama Jius adi dedema pakanama banegidima ġarodie inam riukaua. Be inam kauine nama Jius banegidima e sagusagudina. <sup>9</sup>Be mate tauna ya yovona da eteni banegidima ei yawasanidina, da taudi sibo Mamaitua isanama a kaisuġusuġuna na raukiviverema aubainama, maika girugiruminama porane umanama ya riuna:

<sup>j</sup> 14.21 Gurik bonane inam “waen”.

“Vutuna aubainama taugu eteni banegidima nōgodie isamma yà kaisūguna.

Be taugu yà sarena isamma anikaisūunama aubainama.”

<sup>10</sup> Be mate ya riuna,

“Taumi eteni banegimima matabumi

tauna na banagama mate ko mosari tenāgana.”

<sup>11</sup> Be mate ya riu munāgana,

“Taumi eteni banegimima matabumi Bada isanama ko kaisūgu,

be matabumi isanama anikaisūunama saredima ko saredina.”

<sup>12</sup> Be peroveta Aisaia ya riuna,

“Guyau vaunama Jese na dame e tubūgana, be tauna tokare banaga matabudi ei badedi,

be eteni banegidima matabudi tauna tai sumāgena.”

<sup>13</sup> Vutuna aubainama taugu yà moimoiragina taumi aubaimima da taumi Bada koi sumāge, be Mamaitua tauna mosari be suba nopomima ei mōgavuna. Be dabudine Arua Babau na rewapanama mate nopomima ei mōgavuna. Be taumi ko kataie da tokare Mamaitua nenēgarinama e utemina.

### Pol uma letanama ya girugirumina, ya giuena

<sup>14</sup> Yau bana, taugu è katai kauena da taumi banaga veremima be uma giudima koya katakatai kauedina be taumi tenetenēginama tokare ami banagama mate koi kawa raukuravivirana. <sup>15</sup> Taugu uma letanama ma raudebatoragu è girumina taumi ġaromie, da uma yabedima yà riuwainōgotimina aubainama. Taugu nama è voiana, baninama Mamaitua na raukiviveree <sup>16</sup>taugu Yesu Keriso na taunoyama. Taugu maika pirisi, baninama eteni banegidima ġarodie Mamaitua varinama verenama yà rauguguyena, be taugu yà ġoēgoena da eteni banegidima yà veraūgedina Mamaitua ġarone maika puyo, nama Mamaitua e ġoēgoena. Be Arua Babau e voiedi da taudi Mamaitua na banagama ta tubūgana.

<sup>17</sup> Taugu Mamaitua na taunoyama, be nuaguma ya verena da Yesu Keriso ya riuporeguna, vari verenama yà rauguguyena aubainama. <sup>18-19</sup> Be yodi taugu nam yaba ġesaudima ama giugiuemina, be abāga Keriso ya voivoiedina, vutudiġa yà giuedina: Arua na rewapanae taugu mataira be voia dosidima è voiedina, be inam kauine Bada Yesu rewapanae ya uteguna da eteni banegidima yà̄ katakataidi da taudi Mamaitua ta voteyeteyena. Be taugu Jerusalemma Keriso varinama rauguguyenama èi karena, naumeki da Ilirikumma è tavana.

<sup>20</sup> Taugu rāgan matabuna yà ġoēgoena da vari verenama yà rauguguyena banaga aitaūga Yesu Keriso nam ti katakataiena ġarodie. Be aitaūga Yesu Keriso varinama a vaivaiena, taudi ġarodie nam yà nāgo, baninama taugu nam banaga na tuatuama yawai midiri

dokena nonoġinama debane vada yà keri. <sup>21</sup>Taugu yà voiena maika girugiruminama porane ya riuriuna nama,

“Taudi aitaūga rauguguya nam ti vaivaiena, taudi tokare ta vaie be ta kitana.

Be aitaūga da nam varinama ti vaivaiena, taudi tokare ta kataienena.”

<sup>22</sup>Vutuna noġotine raġan toitoi verau è raurubuena da sibo ġaromie è verauna, be nam teneteneġina.

### Pol Rom naġonama e ġoeġoena

<sup>23</sup>Be yodi uma dobudine yau noyama ya kovina. Suara da suara taugu è ġoeġoena da taumi sibo è kitemina, <sup>24</sup>vutuna aubainama yodi taugu yàwai ogana da yà kitemina Spein naġonama raġanine. Be raġanine taugu ġaromie yà tavana, dabudine taugu taumi mate tài nuavere be tà miana raġan ġaubonaġa. Be muriġa taugu yà ġoeġoena taumi ko sagugu da Speinma yà naġona.

<sup>25</sup>Be yodi taugu yà naġonaġona Jerusalemma, Mamaitua na banagama kaisagudima aubainama. <sup>26</sup>Baninama Masedonia be Akaiama tauwai sumaġa banegidima ma nuaveredi mane a uteguna da taugu Jerusalemma tauwai sumaġa ġesaudima waikaruwaġewaġedima sibo è utedina. <sup>27</sup>Taudi riukaua, ma nuaveredi mane a uteguna. Be taugu yà noġonoġotina da inam naumeki nama a voiana, baninama eteni banegidima taudi varinama verenama Jius ġarodie a paġona, vutuna aubainama naumeki da tubuġe sibo a sagudina. <sup>28</sup>Be raġanine Jerusalemma tauwai sumaġa waikaruwaġewaġedima mane ya utedi e kovikovina murine, taugu yau vaġaima yà karenna Spein aubainama. Be inam raġanine taugu yà vakitemina. <sup>29</sup>Taugu è kataienena da raġanine ġaromie yà veraverauna, Keriso waiaiaina dosinama e uteguna taumi aubaimima.

<sup>30</sup>Yau bana, Bada Yesu Keriso isane be Arua na wainuapaġoe taugu yàwai baġa vavasaġemina da yau pirpirie ko sagugu da Mamaitua ġarone aubaiguma ko moiragina. <sup>31</sup>Ko moiragi da Mamaitua e midi ġaġarigu da Judia banegidima gewegewedima nam sibo a vunuġigu. Be mate ko moiragi da yau noyama Jerusalem nōpone tauwai suamaġa sibo ai aninena. <sup>32</sup>Yodibe Mamaitua na ġoane taugu ma nuaveregu yà tavana taumi ġaromie da yà sipere, be taumi mate tài nuavere tenaġana. <sup>33</sup>Mamaitua, suba tauvoienama taumi matabumi ġaromie. Inam riukaua.

### Pol na waikaiwama

**16** <sup>1</sup>Taugu nuvudama Fibi ġaromie yàwai maġatarina. Tauna Senkiria ekalesia adi taunoyama waivinama. <sup>2</sup>Be yàwai baġemina da tauna ko rabe kauena, nema Bada na taunoyama ġesaudima

ko raberabe kauedina nama. Baninama tauna banaga toitoi e sagusagu kauedina be taugu mate.

<sup>3</sup>Yau banagama Prisila be Akwila<sup>k</sup> ko riuedina yàwai kaiwedina, taudi Yesu Keriso na noyae taukaisaguguma. <sup>4</sup>Be mate taudi adi yawasanama a tuağaiedi be ai uta munağedi da ai sasaranana, saguguma aubainama. Be inam kauinama aubainama taugu yàwai kaiwa vavasağedina, nam tauguğ be eteni nopolie ekalesia matabudi mate kawai kaiwedina uma kauinama aubainama. <sup>5</sup>Be ekalesia Prisila be Akwila adi vadae tawai rawateğeidina mate yàwai kaiwedina.

Be tura yağaguma Epainetas mate ko riuena yàwai kaiwena, tauna vutuna Eisia provinsnama nopone yai Kuristen dokana. <sup>6</sup>Meri ko riuena yàwai kaiwena, tauna vutuna aubaimima ya noya guratana. <sup>7</sup>Andronikus be Junias ko riuedina yàwai kaiwedina. Taudi rabui taugu yau damma nopone be dibure a biri tenağemaina. Apasol matabudi taudi rabui a vivivivira kauedina, taudi Keriso ai sumağä dokena, muridie taugu èi sumağana. <sup>8</sup>Amplias ko riuena yàwai kaiwena, baninama Bada na wainuapağoe tauna turaguma. <sup>9</sup>Urbanus ko riuena yàwai kaiwena, tauna Yesu Keriso na noyae taukaisagumaima. Be tura yağaguma Stakis mate, ko riuena yàwai kaiwena.

<sup>10</sup>Apelles ko riuena yàwai kaiwena, tauna na waisumağama Kerisoe a kita da yai rewapanan kauana. Be Aristobulus na vadama banegidima mate ko riuedina da yàwai kaiwedina. <sup>11</sup>Herodion ko riuena yàwai kaiwena, tauna yau damma nopone. Be Nasisus na vadama banegidima mate ko riuedina yàwai kaiwedina, taudi matabudi Bada tauwai sumağenama. <sup>12</sup>Tiripina be Tiriposa ko riuedina yàwai kaiwedina, inam waiwaividima rabui taudi Bada ġarone ta noyanoya guratana. Be turaguma Parisi mate ko riuena yàwai kaiwena, inam waivinama mate Bada ġarone ya noya guratana. <sup>13</sup>Rupas ko riuena yàwai kaiwena, tauna Bada ya vinena, be tinanama mate ko riuena yàwai kaiwena, baninama tauna ya rabeguna maika kabe tinağomigu.

<sup>14</sup>Asinkiritas, Pelegon, Hemes, Patorobas ko riuedina matabudi yàwai kaiwedina. Be Hemes na banagama ġesaudima ġarone, mate ko riuedina da yàwai kaiwedina. <sup>15</sup>Pilogolus, Julia, Nereus be nuvunama mate, be Olimpas be tauwai sumağä matabudi tauna ġarone, ko riuedina da matabudi yàwai kaiwedina. <sup>16</sup>Be Keriso na ekalesiama matabudi adi waikaiwama taumi ġaromie. Be wainuapağoe koi kaiwa vivirana waisuruva mate.

### Pol na giuma damonama

<sup>17</sup>Yau bana, yà riuriu vavasağemina da ko kita kauana, banaga aitaúğä ekalesia taudariğedima, nam koi turanedi. Baninama aba

<sup>k</sup> 16.3 ‘Prisila’ tauna waivi, be na badama ‘Akwila’.

waikatakatainama koya paḡopaḡona, inam banegidima ami waisumaḡe tokare ta kawa gewegewemina. <sup>18</sup>Inam banegidima taudi nam Yesu Keriso na noyama tima voivoiena, be taudiḡa ta sagusagu munaḡedina. Adi giu yaḡayaḡae be adi gwayaē taudi banaga adi noḡotama vogwaḡegwaḡedima tawai kedadoka waigewedina. <sup>19</sup>Banaga matabudi a vaiemi da taumi matabumi Bada ko vovo teyeteyena. Vutuna aubainama nuaguma ya vere kauana. Be taugu yà ḡoegoena da taumi raḡan matabuna vere adi kedama ko katai kauedina. Be gewagewa kedane nam ko naḡo. <sup>20</sup>Raḡan ḡaubonaḡa Mamaitua suba tauvoienama tauna e voiemi da Seitan kaġemie e vapisana. Be dà Badama Yesu na raukiviverema ḡaromie e kenana.

<sup>21</sup>Timoti Yesu Keriso na noyae taukaisaguguma, tauna ewai kaiwemina. Be yau damma banegidima Lusias, Jeson be Sosipata, taudi mate tawai kaiwemina.

<sup>22</sup>Taugu Tertius, vutuna Pol aba e giugiuena yà girugirumina, Bada isane yàwai kaiwemina.

<sup>23</sup>Be Gaiyas mate ewai kaiwemina, tauna na vadae taugu be ekalesia kawai rawateḡemaina. Be Erastas tauna uma meagaine mane taurabenama, be turadama Kwatius, taudi mate tawai kaiwemina.

<sup>24</sup>Bada Yesu Keriso na raukiviverema matabumi ḡaromie e kenana. Inam riukaua!<sup>l</sup>

### Bada isanama tà kaisuḡuna

<sup>25</sup>Taugu yodi vari verenama ḡaromie è rauguguyena, aubainama Mamaitua nimane yà biribirimina, da tauna vutuna e rabe kauemi be e voiemi da ami waisumaḡe koi rewapanana Bada isane. Inam Mamaitua na ogama taumi eteni ḡaromie da yawasana ko paḡona. Pakane boni uma kauinama semosemonama. <sup>26</sup>Be yodi Mamaitua ya riu vavasaḡana da inam varinama verenama dobu matabuna tà rauguguyena da banaga matabudi Keriso tai sumaḡe be ta voteyeteyena. Peroveta nama a girumina. <sup>27</sup>Mamaitua taunaḡa nuauyauya baneginama. Tauna Yesu Kerisoe yaba matabudi ya voiedina. Vutuna aubainama tauda isanama tà kaisuḡusuḡu nonoḡena. Inam riukaua.

<sup>l</sup> 16.24 Gurik baibol ḡesaudine uma versnama 24 nam ima kenakenana.